

Ngsäea KHUT Pyenhlüma

Ngsäea khutbi cun Luhka naw a yuka Thangkdawa msapnaka kyaki. Hin üng aktunga a pyen hlünak cun, Jesuha axüisaw kcüke naw, Ngmüimkhya Ngcima lam msümnak am, Jerusalem, Judah khaw, Samarih khaw ja khawmdeka adütnak vei cäpa Thangkdaw ami pyena amawnga kyaki (1:8). Ngsäea khutbi üng a yuka Khritjana khutbi cun, Judah khyange üng tünei lü khawmdek khan avan naw ami jum lawa mawnga kyaki. Ca yukia a pyen hlü ta, Khritjane naw Romah khyawngpe tu khaiea am akyanak ja, Khritjan jumna naw Judahea jumna akümbesaka mawng cun, ca khekie naw ami ksing vaia phäha a yuknaka kyaki.

Jesuha mawng Thangkdaw ami pyen law ja Khritjan Sangcim ami mdüi lawa mawng cun, kthuma mtai lü mdanki: (1) Jesuh khankhawa a kai be käna Jerusalema Khritjan angtüi lawa mawng; (2) Palestin khaw avang üng a pha lawa mawng; (3) Romah khaw üng khüt khaia Mediterranean khaw avan üng a pha lawa mawnga kyakie.

Ngsäea khutbi üng aktung bawka a mawng mat cun, Jerusalema Pentikos mhnüp üng, jumki khyange kthayüi ja pe lawkia Ngmüimkhya Ngcima khutbia mawnga kyaki. Acuna Ngmüimkhya Ngcim naw sangcim ja Khritjan

ngvaie cun kthayüi ja pe lü lam a ja msüma mawng pi mdangki. Khritjan thangkdawa aphung cun hin üng vekia ami ngthupyenea kyaki. Jumkiea xünnak ja khritjan sang hea mlungkaw matnak naw thangkdawa hlüngtainak ami mdanga mawng pi ngdang khaia yuka kyaki.

Amawng ktawie

Bawi Jesuh amawng ksingpüi vaia ami ngtüneinak (1:1-26)

a. Jesuha ak'hnu säiha ngthumkhän ja khyütam (1:1-14)

b. Judah Iskarota nghnün üng xünak be (1:15-26)

Jerusalem üng ksingpüia mawng (2:1—8:3)

Judah ja Samarih hne üng ksingpüia ami kya amawng (8:4—12:25)

Pawluha khutbi (13:1—28:31)

a. Mhnama khutbi khaia a cehnak kcük (13:1—14:28)

b. Jerusalema ami bia konfaren (15:1-35)

c. Mhnama khutbi khaia a ceh anghngihnak (15:36—18:22)

d. Mhnama khutbi khaia a ceh akthumnak (18:23—21:16)

he. Jerusalem, Caesarea ja Romah khawa Pawluh thawngim üng a khyuma mawng (21:17—28:31)

¹Theophiluh aw: Ka yuk kcüka cauk cun Jesuh naw jah mthaimthang lü khut a pawh lawnak üng tünei lü,

² khankhawa a kai be vei cäpa ania mawnglama kyaki. Ani cun naw khankhawa am a kai be ham üng, a xüa Ngsäe cun Ngmüimkhya Ngcima johit am lam jah msüm hütki.

³ Ani cun a thih käna mhnüp kphyükipa k'um üng Ngsäea veia khawvei ngdang be lü a xün bea mawng cun akcanga mdang hütki. Ngsäe naw ani cun hmukie, ani naw pi Pamhnama pea mawng jah mthetki.

⁴ Acunüng, Ngsäe jah ngbämsaki naw,* “Jerusalem käh cehta u lü, ka Paa khyütam, nami ngjaka ka pyen khawi cän ana k'äih ua.

⁵ Johan naw tui üng Baptican ning ja peki, khaw mhnüp am hjo lü Ngmüimkhya Ngcim üng Baptican nami kham khai” a ti.

Jesuh khana kai beki

⁶ Acunüng, amimi cun, atänga ngkhäm law u lü, “Bawipa aw, atuha Isarele üng pe na jah pet khai aw?” ti u lü, ami kthäh.

⁷ Acunüng, Jesuh naw, “Akcün ja ahnün cun ka Pa naw amäta themnak üng a cenga kyase, nangmi naw nami ksing vaia am kya ve.

⁸ Acunsepi, Ngmüimkhya Ngcim nami khana a pha law üng, johit am nami be law khai. Acunüng, Jerusalem mlüh, Judah, Samarih ja khawmdeka adütnak cäpa, kei a saksia nami kya khai” a ti.

1:4 Lk 24:49 * **1:4** Atänga ami law üng; am ani üngani cun amimi üng a ve k'um üng, am ani üngani cun amimi üng atänga a ei üng. **1:5** Mt 3:11; Mk 1:8; Lk 3:16; Jn 1:33 **1:8** Mt 28:19; Mk 16:15; Lk 24:47,48

⁹ Acuna ngthu a pyen law päng üng, ami hmuh mahmaha khana kai be se, khawngmei naw am ami hmuh be thei vaia a thupin.

¹⁰ A hang kai be üng axüisawe naw khankhawa han бүк кyetkie. Acunüng, khyang nghngih suisak abawk jah suisa ni lü, ami peia ngdüi lawki xawi.

¹¹ Acu xawi naw, “Kalile khyange aw, ise khankhawa hang mang u lü, nami ngdüikie ni? Hina Jesuh hin nami vei üngkhyüh nami hmuha khana a kaia mäiha, law be khai” ani ti.

Judah Iskarota hnün

¹² Acunüng, Ngsäe cun Olip mcung ami ti üngka naw Jerusalem mlüha cit bekie. Acuna mcung cun Jerusalem mlüh üngkhyüh kilometer mat banga thuki.

¹³ Amimi cun mlüha pha be u lü, ami im kainaka k'uma lutkie: acune cun, Pita, Johan, Jakuk, Andru, Philip, Thomah, Batolame, Mahte, Alaphaha cakpa Jakuk, Sihmon Zelot ja Jakuka cakpa Judaha kyakie.

¹⁴ Amimi cun, Jesuha nu Marih ja akce nghnumie ni, Jesuha a nae am, atänga ngkhäm u lü ktaiyü läkie.

¹⁵ Acunüng, angawi tiktuh üng, jumkia khyange ami ngkhäa phya ja mku cun ngkhäm lawki he. Pita naw ami nglunga ngdüi law lü,

¹⁶ “Ka benae aw, Jesuh man khaie üng, lam ja msümkia, Judah Iskarota mawng Cangcim üng vekie cun küm päng ve. Acuna Cangcim cun

Ngmüimkhya Ngcim naw Davit üngkhyüha a pyena kyaki.

¹⁷ Judah cun axüisaw mata kyase, khut mi binak üng pi ngpüi vaia a xüa kyaki.

¹⁸ Ani cun am daw khaia ngui yah lü khaw hnün mat khyäiki, acunüng kya law lü ta a khawn pawk lü, a khyü avan lut law päihki.

¹⁹ Acuna mawng cun Jerusalema vekia khyang avan naw ngja u lü, acuna khaw hnün cun, amimäta ngthu am, ‘Akeldama ami sui, acun cun, ‘Thisen Hnün’ tinaka kyaki.

²⁰ “Salan caup üng, ‘A im xawngai lü, ak’uma u am ve se,’ ti lü ng’yuki, acuna thea ng’yuk betüki ta, ‘khyang kce naw ania hnün bi se’ a ti.

²¹⁻²² “Acunakyase, Johan naw Baptican[†] a ja petnak üng tün lü, Jesuh khana a kai be cäpa, mi veia citcawn hü lü vekie üngka, Bawipa Jesuha a thawhnak be saksi na lü jah sang püi khaia khyang mat mi mcawn be khai” a ti.

²³ Acunüng, ani cun khyang nghngih üngka mat xü vaia mkyäpkie. Acun xawi ta Josep: Barsaba ami tia Jastas ja Matthias kyaki.

²⁴ Acunüng, amimi ktaiyü u lü, “Bawipa, khyanga mlung avan na ksingki,

²⁵ a venak vaia cit pängki Judaha hnün üng ngsä khut bi khaia hin xawi üngka u na xüki, jah mtheha” ami ti.

²⁶ Acunüng, cung kphawng u lü, Matthias naw cung yah se, ani cun ngsä xaleiate am atänga

1:18 Mt 27:3-8 **1:20** Sal 69:25; Sal 109:8 **1:21-22** Mt 3:16; Mk 1:9; Lk 3:21; Mk 16:19; Lk 24:51 † **1:21-22** Johan naw bapticana mawng sangki; am ani üng Johan naw ani baptican peki.

khutbi hnga khaia mcawnkie.

2

Ngmüimkhya Ngcima phalawnak

¹ Pentikos mhnüp a pha law üng, jumeikia khyang avan cun atänga hnün at üng ngkhämkie.

² Acunüng, khankhaw üngkhyüh naw, anxita, khawkhia mäiha ng'yüngki cun ami venaka im üng pha law lü be lawki.

³ Acunüng mleie cun meia mäiha däi lü mat cim üng pek se ami hmuh u.

⁴ Ami van cun Ngmüimkhya Ngcim am be u se, Ngmüimkhya Ngcim naw a jah ngthuheisaka mäiha, ngthu kce am ngthuei lawki he.

⁵ Acunüng, khankhawa ke khawmdek khan, khyawngpe naküt üngka naw lawki he jumeikia Judahe cun Jerusalem mlüha vekie.

⁶ Acuna ng'yüng ami ngjak ja, khyange ngkhäm lawki he. Axüsawea ngthu pyen cun khyang naküt naw amimäta ngthu a phäh phäh üng ngjak u lü, cäieikie.

⁷ Acunüng, ami ngkhä cäica law u lü, “Hina ngthu pyenkie cen Kalile khyangea am kya u bä!

⁸ Ise hina ami ngthu pyen cän mi van naw mi khyü phäh phäh üng mi ksing thei ni?

⁹ Mimi cun avang Pontas khaw, Medih khaw, ja Elam khawa kae; avang cun Mesopotemih khaw, Judah khaw, ja Kappadokih khawa kae; avang cun Pontuh khaw ja Asah khawa kae,

¹⁰ avang cun Pharikih khaw ja Pampulih khawa kaea, avang cun Egypt khaw, ja Kurinih khaw peia Lihbuh khawa kaea mi kyaki. Avang he cun Romah khaw üngka naw kdung lawki hea Judahe ja Judah thum üng ngkhawkia Khyang-mjūkcea mi kyaki.

¹¹ Avang cun Karete khaw ja Arab khaw ja Judah khawa kaea mi kyaki. Cunsepi Pamhnam hlüngaikia khutbi cun pyen u se, mimäta ngthu phäh phäh üng mi ngjaki ni” ami ti.

¹² Amimi cun aktäa cäica u lü, “Hin hin ia suilam ni?” ti u lü ngthähki he.

¹³ Acunüngpi khyang kcee naw, “Hina khyange hin mpyüi lawki he ni” ti u lü jah yaiheikie.

Pitaa ngthu pyen

¹⁴ Acunüng, Pita cun a püi xaleiatea ksunga ngdüi law lü, angsanga, “Judah üngka khyange ja, Jerusalem mlüha nami vekia khyange aw, nami van naw na ngai ua, hina asuilam cun ka ning jah mtheh khai.

¹⁵ Hina khyange cun nami ngaiha mäiha, am mpyüi u, tuh cun ngawilam naji kaw ni a law ham ve.

¹⁶ Hin cun sahna Jolah naw ana pyen khawia mawng ni:

¹⁷ ‘Pamhnam naw, akpäihnaka khaw mhnüpe üng, hikba ka pawh law khai, khyang naküta khana ka Ngmüimkhya ka bui law khai. Nami cakpae ja nami canglae naw ka ngthu sang khaie; cawngpyange naw Pamhnama mdan hmu law khaie, axü ngaiae müngmang mah khaie.

18 Acuna khaw mhnüpe üng, ka mpyae nghn-umi kpami avana khana ka Ngümüimkhya ka bui khai, amimi naw ka ngthu sang khaie.

19 Khana vekia khankhawa cäica phyaki he ja, mcea vekia mdek khana kyühkyawk phyaki he ka ja mdang khai. Thisen lawng khai, mei ve law lü meikhu ngmüp khai.

20 Hlüngtai kyäpsawkia Bawipaa kyum law-nak vaia Mhnüp am a pha ham üng, jin mü law lü khaw nghmüp law khai, khya pi thisena thawn lü sen law khai.

21 Acunüng, au pi Bawipa naw a jah yung vaia khüki naküt küikyannak khai' a ti.

22 "Isarel khyange aw, hina ngthue cän ngai ua, Pamhnam naw Nazaret Jesuha ana cun muncam phyaki he ja kyühkyawk phyaki he ani üng a mdang pänga kyaki. Acune cun nami veia ngdang pängkia kyase nami van naw nami ksingki.

23 Pamhnam naw a mlung ngaiha mäiha Jesuh cun nami kut üng ning jah mhjum pängki ni; acunüng, nangmi naw ani cun khyang ksee mah maha kutlamtung üng nami jah hnimsaki.

24 Acunüngpi Pamhnam naw thihnak üngka, mtho be lü a lätsaka kyaki. Acunakyase thihnak naw ani cun am a man theia kyaki.

25 Ania mawng cun Davit naw pyen lü, 'Bawipa cun am ka ve ham kcüne üng ka hmuki, ani cun ka hlawnga veki, kei üng ng'änak am ve.

²⁶ Acunakyase, ka mlung jenak üng be lü ka ngthu pi jekyainak üng beki. Kei cun thi theikia pumsaa ka kya üngpi, äpeinak üng ka ngtungjin khai.

²⁷ Isetiakyaküng, nang naw kei cun thihnak khawmdeka am na hawiki; sitihkia na mpya cun ng'uhnaka a thu vai am tängki.

²⁸ Nang naw xünnaka lam cun na, na mhnuh päng ni, atänga na, na vepüinak naw na jekyaisak khai" a ti.

²⁹ "Ka püie, mi pupa üng ngming ngthangkia Davit sangpuxanga mawng cun angsinga ka ning jah mthekh khai ni. Ani cun thi se ami k'ut pänga kyaki, a lungdü pi tuh vei cäpa mi veia ve hamki.

³⁰ Ani cun sahmaa kyase, ani naw Mhnama khyütam ksingki, Davita ngsawn üngka mat mat cun Davita kba sangpuxanga kya be khai tia Pamhnama khyütam cun ksingki.

³¹ Pamhnam naw ngawia i bi law khai ti cun Davit naw hmu lü, Mesijah a thawh be vaia mawng a pyennak üng, 'Ani cun thihnak khawmdeka käh hawih khai, a pumsa pi ng'uhnaka käh thuei khai' a ti.

³² Acuna Jesuh cun Pamhnam naw thihnak üngkhyüh mtho be lü, mi van cun acuna saksia mi kyaki.

³³ Ani cun a pa, Pamhnama khet da mhlünmtaia kyaki, a khyütama mäiha Ngmüimkhya Ngcim cun a pa veia yah lü, atuh nami hmu ngjaka a bänak cun mi khana a pha lawsaka kyaki.

³⁴ Davit cun khankhawa am kai ham; acunsepi ani naw pyen lü, ‘Bawipa naw ka Bawipa veia: Ka khet lama ngawa,

³⁵ na yee cun na khawpha na mtainak vaia am ka jah tak hama küt üng” a ti.

³⁶ “Acunakyase, Isarel khyange aw, nangmi naw kutlamtung üng taih u lü nami hnima Jesuh cän, Pamhnam naw Bawipa ja Mesijaha thawnsak päng ni ti cän angtea nami ksing vai” a ti.

³⁷ Acun ngjakia khyange cun aktäa ami mlung cäicing se, Pita ja ngsä kceea veia, “Benae aw, i kami pawh khai?” ti u lü, kthähkie.

³⁸ Acunüng, Pita naw, “Ngjut ua, nami mkhyekat mhlätnek vaia Jesuh Khritawa ngming am Baptican khan ua; acunüng, Pamhnama Ngmüimkhya Ngcim nami yah khai.

³⁹ Pamhnama khyütam cun, nangmia phäh, nami caea phäh ja, akthuknaka vekiea Bawipa mi Pamhnam naw a veia a jah khü naküta phäha kyaki ni” a ti.

⁴⁰ Acuna thea, Pita naw ngthu khawha pyen lü, “Hina khyang ksee phäh law khaia mkhuimkhanak üngkhyüh ng’yungei ua” tia, a jah nghuinak.

⁴¹ Khyang khawhah naw ania ngthu pyen cun jum u lü Baptican khankie, acuna mhnüp üng khyang thawng kthum bang ngkhaw lawki he.

⁴² Acune cun, Ngsäe naw jah mthei u se, atänga ve u lü, atänga eiaw u lü, atänga ktaiyü lü vekie.

Jumeikie ksunga ngneisak

⁴³ Ngsäe naw müncam phyaki he ja kyühkyawk phyaki he khawhah ja pawh u se, khyange cun cäi päihkie.

⁴⁴ Jumeikie naküt cun mlungkaw mat am ve u lü ami khawhthem he pi yetca u lü summangkie.

⁴⁵ Amimi cun ami khawhthem he jah jawi u lü, ami yaha ngui cun hlükawki mat cim üng ami jah yet u.

⁴⁶ Amimi cun amhnüp tä se Templea ngkhyum u lü, ami ima pi mlung nemnak ja jekyainak am atänga eiawki he.

⁴⁷ Pamhnam mküimto u lü, khyang naküta jenak vaia vekie. Acunüng Bawipa naw küikyannak yahkie cun amhnüp tä se jah mkhaw lü amimi cun a jah nungsak.

3*A khawkse mdaw bea mawng*

¹ Acunüng, Pita ja Johan cun mü lam naji kthum üng ktaiyü khaia ktaiyünaka kcün üng Templea citki xawi.

² Khyang mat a hmi law üng tün lü xoki ami kaw law. Temple k'uma lutkiea veia kthähei khaia, mkawt ngto ami tia peia, amhnüp tä se ami vesak;

³ Acun naw Pita ja Johan Temple k'uma lut hlüki xawi ja hmu lü, ani veia kthäheiki.

⁴ Pita ja Johan naw ani bükteng, cun üng, Pita naw, "Ja büktenga" a ti.

⁵ Acunüng, ani naw ani veia icamä yah khaia ngai lü, ja han bükteng se,

⁶ Pita naw, “Nguï ja xüi am ta üng; acunsepi ka tak ka ning pe khai: Nazaret Jesuh Khritawa ngming üng na khaw am ngdüi lü cita” a ti.

⁷ Pita naw a khet kut man lü mtho se; acun ja angxita a khaw xawi ja a khawmike cun kthamah law bekie.

⁸ Ani cun tho law lü, ngdüi lü a khaw am citki. A khaw am cit hü lü, ju jawng hang jawng lü, Pamhnam a mhlünmtai maha Temple k'uma lut haki.

⁹ Acunüng, a khaw am cit hü lü, Pamhnam a mhlünmtai cun khyange naw hmu u lü;

¹⁰ ani cun Temple mkawt ngto ami tia peia kthähei lü ngaw khawiki tia ksing u lü; ania mawng cun aktäa cäicatnak u lü vekie.

Templea Pitaaw ngthu pyen

¹¹ A khaw daw beki naw Pita ja Johan a jah man k'um üng, khyang naküt cun aktäa cäi u lü Solamona ngvawng mkawt ami tia hnün, ami veia dawng lawki he.

¹² Pita naw acun a hmuh ja khyange ja msang lü, “Isarel khyange aw, hin hin ise aktäa nami cäinaki ni? Kamimäta khyaihnak ja kamimäta binak thei am ani cit thei khaia kami pawhkia mäiha i se nami ngaiki ni?”

¹³ Abraham, Isak ja Jakopa Pamhnam, mi pupaea Pamhnam naw, a mpya Jesuh cun mhlünmtaiki ni; ani cun nami ja mansak, Pilat naw mhlät vai a ti üngpi am nami tängki.

¹⁴ Ani cun ngcim lü dawki ni lüpi nami mahkie, Khyang ngcimcai ja khyang ngsungpyun am ngai u lü, khyang hnimki mhlät vaia ksaia Pilat nami kthähki.

¹⁵ Xünnaka Bawi cun nami hnimki; acunsepi Pamhnam naw thihnak üngka a mthawh be ni; acun saksia kami kyaki.

¹⁶ Jesuha ngming naw ni hina akxo cen kyanak a pet ve. Nami hmu ja nami ksing hin Jesuha ngming jumnaak ka phäha ni akya ve. Tuhkbäih nami hmu thei hin Jesuh üng jumeinaka phäha ni akya ve.

¹⁷ Acunsepi, ka benae aw, nami ngvaie naw am ami hnaläüa phäha ami pawha mäiha, nami naw pi am ami hnaläü ka ksingki.

¹⁸ Acunsepi Pamhnam naw sahmae naküt üng, Khritaw naw khuikhanak a khamei vaia ngthu ana pyen law cen, acukba küm lawsaki ni.

¹⁹ Acunakyase, nami mkhyekatnake ja mkhyünak vaia ngjut u lü nghlat be ua, acunüng, Bawipa naw nami mkhyekatnak ning ja mhlät khai.

²⁰ Acunüng, Ngmüimkhya kyanak akcün Bawipa üngka naw pha law se, nami phäha a mcawn päng Mesijah Jesuh cän tüi law khai.

²¹ Acunsepi, Pamhnam naw a sahma ngcimea mpyawng üng ajana a na jah pyen lawe, avan akthaia pyannak bea kcün am a pha hama küt üng, khankhawa ani cun a veia vepüi ma khai.

²² Mosi naw, 'Bawipa nami Pamhnam naw, keia mäi sahma mat nangmi üngka ning jah tüih

law pe khai;* ani naw nami veia ngthu a pyen naküt cun nami ngaih pet khai;

²³ au pi, acuna sahma a ngthu käh ngaiki naküt cun, Pamhnama khyang üngka naw mkhya lü, mkhyüha kya khai' a ti ni.

²⁴ Sahma Samuilah üng tün lü, ak'hnu säiha ngthu pyenkiea sahmae cäpa, ami van naw atuha akcuna mawng cun a na pyen khawikie.

²⁵ Nangmi cun Pamhnam naw nami pae am a na pyen law, sahmae ja ngthumkhäna caea nami kyaki ni; Pamhnam naw Abrahamä veia, 'Nanga ngsawn am khawmdek khyange naküt jodawnak am be khaie tia, nami pupaea veia a jah ngthumkhän.

²⁶ Pamhnam naw a Mpya cun xü lü nami veia a tüih law ma, acun naw nami mkhyenak nglata u lü jodawnak ning jah pe khaia kyaki ni" tia khyangea veia a pyen.

4

Pita ja Johan ami jah man

¹ Pita ja Johan naw khyangea veia ngthu ani pyen k'um üng, ktaiyüe,* Temple mtätki ngvaie ja, Sadukee cun ani veia pha lawki he,

² khyang ani ja mthei ja, Jesuha phäha khyang kthi a thaw bea ngthu ani pyena phäha, ami mlung aktäa am je.

³ Ja man u lü, mü lama akyaa phäha, ngawi cäpa thawngim üng ami ja khyum.

* **3:22** ani naw a na tüih lawa kba; am ani üngkeia kba. **3:23**

Deut 18:19 **3:25** Gen 22:18 * **4:1** ktaiyüe; avang yuknaie üngta ktaiyü ngvaie.

⁴ Acunsepi, ngthu ngaikie jumei u lü; acune cun thawngmhma bang lawki he.

⁵ Acunüng, a ngawia, Judah mkhawngge, ami ngvaie, thum ksinge Jerusalema ngbäm lawki he.

⁶ Amimi cun ktaiyü ngvai säih Anna, Kaiphah, Johan, Aleksanda ja, ktaiyü ngvaia a pacae naküt üng nghmukie.

⁷ Pita ja Johan cun anglunga jah ngdühsak u lü, "Ihawka ahin nani pawh ni. Ia johit ja ua ngming nani sumei ni" ti u lü ami jah kthäh.

⁸ Pita naw Ngmüimkhya Ngcim am be lü ami veia, "Khyanga, mkhawngge ja ngvaie aw,

⁹ a khaw kxo mdaw be üng, 'Hin hin ise daw law beki ni?' tia tungawi keini nami jah kthäh üng,

¹⁰ nami ngkhä naw ksing ua, Isarel khyange naküt naw pi ksing u se, Nazaret Jesuh Khritaw kutlamktung üng nami taih, Pamhnam naw thihnak üngka naw a mthawh be, ania ngming am, hin üng nami hmaia mya lü ngdüiki.

¹¹ Jesuh mawng Cangcim naw a pyen ta, imsae naw ami hawiha lung cun akyäp säiha thawn law be khai, a ti.

¹² Küikyannak hin ani üngkhyüh ni a law, khankhawa kea jah küikyan khaia ania thea ta Mhnam naw u pi am pe."

¹³ Acunüng kawngci üng ngpüikie naw Pita ja Johana ani lingnak jah hmu u lü, ca am ksingki xawi, khyang sawxat xawi tia ami ja ksing üng, aktäa cäikie; ani xawi cun ajana Jesuh hlawnga ve khawiki xawi tia ami jah ksing law.

14 Acunüng, Pita ja Johan naw ani mdaw be cun ani hlawnga ngdüi se ami hmuh ua kyase, ipi am pyen thei u.

15 Acunakyase kawngci k'um üngkhyüh jah ksät u lü ami mät ngthähngkhyahkie.

16 “Hin xawi hin ihawkba mi jah pawh vai u ni? Müncam phya kcangki pawhki xawi ni tia, Jerusalem mlüha veki avan naw ksingkie; mimi naw pi mi ksingki.

17 Acunsepi, khyangea veia am ani jah mtheh hü vaia, atuh üng tün lü, ua veia pi hina Jesuha ngming üng käh ani jah mtheh hü vai ja mi jah pawh vai u ami ti.”

18 Acunüng, Pita ja Johan jah khü u lü, Jesuha ngming pyen lü käh ani jah mthei vaia ami jah mtheh.

19 Acunsepi, Pita ja Johan naw ami msang ta, “Pamhnama hmuha Pamhnama ngthu ngaih hin dawki aw, nangmia ngthu ngaih hin daw bawkh khai aw ti cun ngai sum u.

20 Keini ta kani hmuh ja kani ngjak cun am pyen lü am ve thei ni ngü” ani ti.

21 Acunüng, kawngci ngvaie naw jah mkyüh kse hlen be tü u lü, ami jah mhlät be. Acunüng, ani bilawha phäha khyang naküt naw Pamhnam mküimtokie; khyangea phäha ami jah khuimkhanak vaia am hmu lü vekie.

22 Müncam phya khaia ani mdaw be cun kum kphyükipa kthaka dämkiä kyaki.

Jumeikie lingnak vaia ktaiyükie

²³ Acunüng, Pita ja Johan cun ani lät be ja, ani püiea venaka cit ni lü, ktaiyüe ngvaie ja angvaie naw ani veia ami pyen naküt ani ja mthet be.

²⁴ Acunüng, acun ami ngjak üng, atänga Pamhnama veia ami ktaiyü ta, “Bawipa aw, nang khankhaw, khawmdek ja mlik tui ja a k'uma vekü naküt mhnünkia na kyaki;

²⁵ nang naw, Ngmüimkhya Ngcim am, na mpya Davit kami pupa naw a pyen ta, ‘Ise khyang mjü kce ami mlungsoki? Ise khyange naw, am ngtähkia ngaikie ni?

²⁶ Khawmdek sangpuxange ja jah upkie naw atänga ngkhyum u lü, Bawipa ja Mesijah cun jah ngtük ngkhaih püikie ni’ a ti.

²⁷ “Hina mlüh üng na mpya ngcim Jesuh, Mesijaha na mcawn hneng u lü, Herod ja Pontas Pilat cun khyang mjü kcee ja Isarele akcanga ngkhyumkie ni.

²⁸ Thawn law khaia na khyaihnak ja na ngjak'hlüa ajana na mhnün päng cän pawh khaiea atänga ngcun lawki he.

²⁹ Acunüng, Bawipa aw, atuh ami jah mkyüh hin büktenga; na mpya xawi hin lingnak am na ngthu jah pyensaka.

³⁰ Khyange jah mdaw be khai xawia, nang naw na kut säng lü; na mpya ngcim Jesuha ngming am, müncamnak ja cäicatnak jah pawhsak kawm pi” tia, ktaiyükie.

³¹ Acunüng, acukba ami ktaiyü law päng ja, ngkhäm u lü, ami venak cun ngsün lawki.

Ami van Ngmüimkhya Ngcim am be law u lü Pamhnama ngthu cun ling lü sangkie.

Jumeikie naw ami tak ng'yetkie

³² Acunüng, jummeikia khyange cun, mlung mat takie. U naw pi ami ka üng ka kaa ni am ti u. Ami tak cun avan naw ng'yeteikie.

³³ Acunüng, ngsä he naw johit däm üng Bawi Jesuha thawnak be cun saksi na u se; ami khana dawkyanak Mhnam naw jah peki.

³⁴ Acunüng, ami veia hlükawki u am ve; ime ni, laie ni, jah takie naw jawi u lü, ami jawiha phu ja lawpüi u lü,

³⁵ ngsä hea khaw kunga, jah ta law u se, hlükawki üng ahlükawa kba ami jah yet.

³⁶ Acunüng, Josep, Kuparuh khaw khyang, Levih paca, ngsä he naw Banabah ami ti, (Acun cun “ngjuktha jah pe theiki”) naw,

³⁷ a lo jawi lü, a yah ngui cun law püi lü, ngsä he üng a jah ap.

5

Anani ja Saphira

¹ Acunsepi, khyang mat Anani ngmingnaki, a khyu Saphira am veki xawi; Ani xawi naw khawhnün jawi lü,

² a khyua ksinga khawhnün phu avang thup lü, avang däk lawpüi lü Ngsäea khaw kunga a tak law.

³ Acunsepi, Pita naw, “Anani aw, Ngmüimkhya Ngcim na mhlei na khai ja, khawhnün phu avang

na mji khaia, ise khawyam naw na mlung üng bi a bi ni?

⁴ Acuna khawhnün cun a ve ham üng na kaa am kyaki aw? Na jawih käna a phu haw na kaa am kya se aw? Ise hikba na ngaiki ni? Khyang na mhleiki am ni, Pamhnam na mhleiki” a ti.

⁵ Acunüng, Anani naw acuna ngthu a ngjak ja kyu lü thiki; acunüng, ksingkie naküt cun aktäa kyüheikie.

⁶ Acunüng, cawngpyange naw ngdüi law u lü, a yawk hlawp u lü kawtkie naw ami va k’ut.

⁷ Acunkäna, naji kthum bang anghjawk ja, a khyu i am ksing lü, lut lawki.

⁸ Pita naw, “Na mtheha, khawhmün cun hihah däka aw nani jawi?” ti lü, a kthäh. Acunüng, ani naw, “Ä hihah däka ni” a ti.

⁹ Acunüng, Pita naw, “Ise Bawipaa Ngmüimkhya cam khaia nani büki ni? Tenga, na cei k’utkiea khawleh mkawt peia veki, nang pi ni kawt hnga khaie” a ti.

¹⁰ Acun üng anxita, a khaw kunga kyu lü thi sawxatki; acunüng, cawngpyange lut lawki he naw thi se hmu u lü, kawt u lü a ceia peia ami k’ut hnga.

¹¹ Acunüng, sangcime avan ja acuna ngjakie naküt naw aktäa kyüheikie.

Müncamnake ja cäicingnak he

¹² Acunüng, khyangea ksunga Pamhnam naw, Ngsäea khyüh müncamkse ja cäicingnak phyaki he khawha, jah biki. Acunüng, ami cun ami ngkhä mlung mat ta u lü, Solamona mkawt ami tia, atänga nghmukie.

13 Khyang kce u pi ami veia am ngkhaw dat; acunsepi khyange naw aktäa jah mhlünmtaikie.

14 Acunüng, Bawipa jumei law kthaikia nghnumie ja kpmie khawha cun ami veia ngkhaw lawki;

15 Acunüng, Pita cit hü lü a hnge naw a jah hneh vaia am myakie cun lama jah kawt law u lü ihnake ja phakea khana ami jah takie.

16 Acunüng, Jerusalem mlüh pipeia kae am myakie, khawyai ksea jah venake cun jah law püi u lü lawki he; acune cun mya be päihkie.

Ngsäe ami jah mkhuimkha

17 Acunüng, ktaiyü ngvai säih ja a püie Sadukee law u lü ngsä he ami jah ng'eiha phäh ami khana bi vaia ngtängkie.

18 Ngsä xawi jah man u lü thawngim üng ami jah khyum.

19 Acunakyase mthana, Bawipa khankhawngsä mat naw thawng ksawhe jah mhmawng law lü akpung da jah cehpüiki naw,

20 "Cit ni, temple k'uma ngdüi ni lü, khyangea veia xünnak kthaia mawng va pyen nia" a ti.

21 Acunüng, acuna ngthu ani ngjak ja, khaw thai law üng temple k'uma lut ni lü, jah va mtheimthangki xawi. Acunsepi, ktaiyü ngvai ja a püie law u lü, bawi ja, Judah ngvaie naküt cun kawngcia mkhäm lawki he naw, angsä xawi cun thawngim üngkhyüh ami ja lawpüi vaia thawngim da khyang ami ja tüih.

22 Acunsepi, jung ngvaie ami pha law üng thawngima angsä xawi cun am jah hmu u;

acunüŋ, nghlat law be u lü kawngci a ami jah va mtheh,

²³ “Thawngim cun üp yekia ngkhai se, mtätkie pi ksawh peia ngdüi u se kami jah hmuh; acunsepi, kami mhmawng üng, a k'uma u pi am ja hmuh ve üng” ti u lü, ami ja mtheh law.

²⁴ Acunüŋ, temple mtätkie ja ktaiyü ngvaie naw acuna ngthu ami ngjak üng, hikba ngsä hea ve hin i a ngjo ni tia, aktäa cäicingkie.

²⁵ Acunüŋ, khyang mat law lü ami veia, “Teng u, thawngima khyang nami ja khyum xawi naw temple k'uma ngdüi ni lü khyange jah mtheimthang ve ni” a ti law.

²⁶ Acunüŋ, temple ngvai cun ami khyange am va cit u lü, khyange naw lung am ami jah kawng vai kyüh u lü, angsä xawi cun akdawa ami jah lawpüi be u.

²⁷ Acunüŋ, ja pha lawpüikie naw, Kawngci ja ktaiyü ngvai säiha hmaia jah ngdüihsak lü ami jah kthäh.

²⁸ “Ahina ngming am käh nani jah mthei ti vai, tia kami ning jah mtheh päng, ngthu nani ja mtheinak cun Jerusalem üng ngthang hüki, “nani pawh cun ngai nia” ti lü a jah pyen. Ania thinak hin keimi khana nani phaw lawsak vaia nani pawhki aw.

²⁹ Acunsepi, Pita ja ngsä kee naw, “Khyanga pyen kami ngaiha kthaka Pamhnama pyen ni kani ngai khawm.

³⁰ “Nangmi naw Jesuh kutlamktung üng taih u lü, nami hnim cän kami pupaea Pamhnam naw mtho be pängki ni.

31 “Ani cun Pamhnam naw khawngmang ja küikyankia ve khaia Isarele ami mkhyekatnak üngkhyüh ngjut be lü ja mhlät khaia a khet da mhlünmtaiki.

32 Acuna saksia kani kyaki ni; Ngmüimkhya Ngcim, Pamhnam bänak cun ani kcangnakia phäh ni” a ti.

33 Acunüng, acuna ngthu kawngci vawne naw ami ngjak üng, ami mlungso law se, Ngsäe cun jah hnim law hlükie.

34 Acunsepi, Kawngci üngka khyang, a ngming Kamaleilah naki, Phariseea thum ksingki, khyange naküt üng a ngming ngthangki cun ngdüi law lü angsä xawi cun ami jah khyah be vaia a jah mtheh.

35 Acunüng, Kawngcia veia, “Nangmi Isarel khyange aw, hin xawia khana nami pawh vaia nami bü cän cäi lü ngai ma ua.

36 “Ahlana pi, Theuhdah naw, ‘Kei khyang sawxat am ni’ ti lü ve se; a veia khyang khawha, phyakphyü bang a veia ngdawn vaikie. Acunsepi ani cun hnim u se, a ngthu läkie naküt pi avan cencawn hü päih u lü, ia am kya bekie ni.

37 “Ania ve käna, ngming yu u lü ami mkhäm k'um üng, Kalilea ka Judah naki ve law beki; a veia khyang khawhah citkie. Acunsepi, ani pi thi se, a hnu läkie avan khyük päihkie.

38 “Acunakyase, atuh ka ning jah mtheiki, hina khyange käh ja pana u, ani büa ve u se; ani mkhyäp ja ani bilawh, khyanga pawh sawxata akya üng amdanga khyük be sawxat khai ni;

39 acunsepi, Pamhnama bilawha, akya üng, am jah näng thei uki; am acunüng, Pamhnam nami

tukia ksaia nami kya khai ni” a ti.

⁴⁰ Acunüng, acuna pyen cun ngaisim u lü, angsä xawi cun jah khükie naw ami jah kpai; ami ja kpai päng üng Jesuha ngming am ngthu käh sang hü be ti khai xawia ami ja khyah be.

⁴¹ Acunüng, Kawngci üngka naw cit be ni lü, acuna Jesuha phäh luthui hmaisetnak khamei khaia ani nglawia phäha, aktäa jekie.

⁴² Acunüng, amhnüp tä se, temple ja khyangea ima, Jesuh Mesijah mawng cun jah mtheimthang lü sangkie.

6

Jah kuei khai khyüh

¹ Ivei am law ham se, axüisawe nung law u lü, Krik ngthu pyenki Judahe ja Judah ngthu pyenkie cun mtumbäkie. Krik ngthu pyenkie naw kami hmeinue ngcawn ami teyet üng ami jah hawih u ni ami ti.

² Acunüng, a ngsä xaleinghngihe naw jumki khyange avan ja khü u lü “Pamhnama ngthu pyen, hawih u lü ngui xüia phäh kami bi hin am daw ve.

³ Acunakyase, ka püie, nami ksunga Ngmüimkhyä ja themnak am bekiä khyang khyüh xü ua, amimi cun ahin, khut na khaiea kami ja mcawn khai;

⁴ kamimäta, ktaiyünak ja ngthu pyennaka khutbi akcün täse kami bi khai” ami ti.

⁵ Acuna ngthu naw avan cun a jah jesak; acunüng, jumeinak ja Ngmüimkhyä Ngcim am beki Stephen, Philip, Pyakhaw, Nikanor, Tihmon, Parmenah, ja khyangmjükce Judahea jumnak

üng ngpyawtki Antiok üngka Nikolah cun ami jah xü.

⁶ Acune cun Ngsäea hmaia ja ngdüisak u se, Ngsäe naw ami kut taih u lü ami jah ktaiyü pet.

⁷ Acunüng, Pamhnama ngthu cun hnün khawha üng pha hü se; Jerusalema axüisawe aktäa nung law dämdämkie. Acunüng, ktaiyüe üngkae khawha naw jumnak yahkie.

Stephen ami man

⁸ Acunüng, Stephen cun Mhnama dawkyanak ja johit am be lü khyangea veia cäicatnake ja müncamkse jah pawhki.

⁹ Acunsepi, khyang avang, “Sinakok üngka mpya kläte”^{*} ami ti cun Kurinih hnea Judahe, Aleksandria hnea Judahe, Kilikih hnea khyange, Asah hnea khyange naw lawsih u lü Stephen cun ami ngcuh lawpüi.

¹⁰ Acunsepi, Ngmüimkhyaa pet themnaka phäh Stephen ngthu a pyen üng am näng khawh u.

¹¹ Acunüng, khyange ami hlei pyen khaiea; acune naw, “Mosi ja Pamhnam jah kpetnaka ngthu pyen se kami ngjaki” ami ti vaia ami jah kcük.

¹² Acunüng, khyange cun, angvaie ja thum ksinge ami jah ksük, ami mlungso law lü, Stephen cun man u lü kawngcia ami cehpüi u.

¹³ Acunüng, ami hlei pyen khaiea ja ksük u se; acune naw, “Hin naw, hina ngcimcaihkia Temple ja Mosia Thum ja kse naki;

^{*} **6:9** mpyakläte: Ahine cun mpyaki Judahe, lüpi khyaih khameikie am ani üng ami jah mläte.

¹⁴ Hina Nazaret Jesuh naw hina Temple phyeh lü Mosi naw a jah peta thume jah nglatsak khaia a pyen kami ngjaki ni” ami ti.

¹⁵ Acunüng, Kawngci üng ngawki he naw Stephen cun bükteng u lü, a hmai cun khankhawngsäa hmaia mäiha ami hmuh.

7

Stephena ngthu pyen

¹ Acunüng, ktaiyü ngvai naw, “Acuna ngthu kchangki aw?” ti lü, Stephen a kthäh.

² Acunüng Stephen naw msang lü, “Ka bee jah ka pae aw, ngai ua, mi pupa Abraham, Haran khawa am a ceh ham üng Mesopotemiha Pamhnama hlüngtainak a veia ngdang law lü,

³ “Na khaw ja na im üngka naw cit lü ka ning mhnuh vaia pea cita” a ti.

⁴ Acunüng, Abraham cun Khalade khaw üngka naw cit lü Haran khawa va vek; acunüng, a pa a thih käna hina atuh nami venak khawa Pamhnam naw a ngkawnsak.

⁵ Acunüng, hia ta a venak vai, a khawpa a takeinak vai pi Pamhnam naw am pe; acunsepi, amät ja a ngsawne cäpa khawh a jah pet vaia am a ca ham üng tün lü khyütamki.

⁶ Acunüng, Pamhnam naw, ‘Na mjükphyüie khyanga khawa kum phyakphyü ve khaie, khyanga mpyaa ve u se, jah khuimkha khaie’ tia a pyen.

⁷ Acunüng, Pamhnam naw, ‘Amimi jah mpya na khaia khyang mjüe pi kamät naw ami lei ka jah mtai law pe khai. Acun këna lät law be u lü, hina hnün üng na hjawkhah law khaie’ a ti.

⁸ Acunüng, Pamhnam naw vun mawih vaia ngthumkhän pe se; acunüng, Abraham naw Isak ca na lü amhnüp khyetnak üng a vun a mawi pet; acunüng, Isak naw Jakop ca na se, Jakop naw a ca xaleinghngihea vun a jah mawih pet acune cun nglo ngthangkie mi pupae ni.

⁹ Acunüng, Jakopa cae naw ami na Josep k’eih u lü Egypt pea ami jawihe; acunsepi, Pamhnam naw vepüi lü,

¹⁰ a khuikhanak naküt üng küikyanki. Josep cun Egypt sangpuxanga maa a pha vai üng Pamhnam naw ani üng themnak ja a hmai vainak pe se, Pharo sangpuxang naw Egypt pe ja a im üng ngvai säiha a mcawn.

¹¹ Egypt ja Kanan pe avan üng khawjaw law se, khuikhanak aktäa ve lawki; mi pupae cun ami ei vai i am ta u lü vekie.

¹² Acunsepi, Jakop naw Egypt pea cang vekie tia ksing lü a cae a jah tüih; acun cun ami cehnak akcüksäiha kyaki.

¹³ Acunüng, anghngihnaka ami ceh üng, Josep cun a beea üng jah mtheh se; acunüng, Josepa khiima mawng cun Pharo naw a jah ksing law.

¹⁴ Acunüng, Josep naw a pa Jakop ja a benae naküt a jah khusak; ami van khyühkip ja hma

7:7 Ex 3:12 **7:8** Gen 17:10-14; Gen 21:2-4; Gen 25:26; Gen 29:31—35:18 **7:9** Gen 37:11; Gen 37:28; Gen 39:2,21 **7:10** Gen 41:39-41 **7:11** Gen 42:1,2 **7:13** Gen 45:1; Gen 45:16
7:14 Gen 45:9,10,17,18; Gen 46:27 (LXX)

lawki he.

¹⁵ Jakop cun Egypt pea ju citki; acunüng, ani ja a tucae cun thikie.

¹⁶ Ami yawke cun Sikem khawa jah cepüi u lü Abraham naw Sikem khawa Hamoa sanga veia ngui am a khyäiha ng'uhnak üng ami ja k'ut.

¹⁷ “Acunüng, Pamhnam naw Abraham veia khyütam akpha law hlü üng, Jakopa mjükiphyüie cun Egypt pea nung mja lawki he.

¹⁸ Josep am ksingkia sangpuxang akce naw Egypt cun up lawki.

¹⁹ Ani naw mi pupae jah mkhuimkha lü hnasen he pi thi khaia im üngkhyüh a jah xawt tawnsak.

²⁰ Acunüng Pamhnama hmaia aktäa ngtokia, Mosi hmi law se, a pa ima khya kthum ami mcah;

²¹ acun käna ami tawnnaka, Pharoa canu naw lo lü amäta ca vaia a mcahei.

²² Acunüng Mosi cun Egypt pea ami ksingkhyapnak naküt jah mthei u se, bilawnak ja pyensaknak thei üng be lawki.

²³ Kum kphyükip a cum üng, a püi Isarele ihawkba vekie ti cun ja va bükteng khaia ngtängki.

²⁴ Acunüng Isarel khyang mat Egypt khyang naw khuimkha se hmu lü, yungki naw Egypt khyang cun a hnim.

²⁵ (Pamhnam naw ani am a khyange jah yung khai tia, a khyange naw ksing khaiea ngai sepi, am ksing u.)

7:15 Gen 46:1-7; Gen 49:33 **7:16** Gen 23:3-16; 33:19; 50:7-13;
 Jos 24:32 **7:17** Ex 1:7,8 **7:19** Ex 1:10,11; Ex 1:22 **7:20** Ex
 2:2 **7:21** Ex 2:3-10 **7:23** Ex 2:11-15

²⁶ Angawi law be tü üng amimät üngka xawi ngtunngpyei nise jah hmu law lü, 'Ka püi xawi aw, bengna xawia nani kyaki, ise nani ngtunngpyeiki ni?' ti lü ja mkhya khaia bü se,

²⁷ a püi ngtunpüiki naw Mosi buk lü, 'Kani khana suki ja ngthumkhyah mkhawnga u naw aning mcawn ni?

²⁸ Müta Egypt khyang na hnima kba na na hnim khaia na büki aw?' a kthäh.

²⁹ Acun a ngjaka phäha Mosi Midian pea cen lü, acuia cakpa nghngih a canak.

³⁰ Kum kphyükip a nghjawk käna, Sinai mcung pei khawkhyawng khawa meia däiki kpyap üngka naw, khankhawngsä mat a veia ngdang lawki.

³¹ Mosi naw acun a hmu üng, aktäa cäi lü bükteng khaia a va k'et üng, Bawipa kthai naw,

³² 'Kei cun na pupaea Pamhnam ni, Abrahama Pamhnam, Isaka Pamhnam, Jakopa Pamhnam ni' ti se, acunüng, Mosi naw kyüh lü am a bükteng dat.

³³ Acunüng, Bawipa naw, 'Na khawdawk cän suta; isetiakyaküng na ngdüinak cän hnün ngcimcaiha mdek ni.

³⁴ Egypt pea ka khyang vekiea ami khuikhanak aktäa hmu veng, ami ngko pi ngja veng, ami jah küikyan khaia ka kyum lawki ni. Tuhkbäih cita, Egypt pea ka ning tüih khai' a ti.

³⁵ Acuna Mosi, 'Kani khana suki ja ngthumkhyah mkhawnga u naw aning mcawn ni?' tia Isarele naw ami mah cun, kpyapa k'uma a

veia ngdang lawkia khankhawngsä naw kpüi se, Pamhnam naw ani kung cun ngvai ja küikyan khaia a tüiha kyaki.

³⁶ Ani naw Egypt pe, Mpanglai Sen ja khawkhyawng khawa kum kphyükip üng, cäicatnak vaie ja müncahkse ja pawh lü a ja ngkhah lawpüi.

³⁷ Isarel khyange üng 'Pamhnam naw kei ana mcawna mäiha,* nami benae üngka sahma mat ning ja mcawn pe khai' ti lü jah mthehki cun acuna Mosia kyaki.

³⁸ Ani cun, khawkhyawng khawa ngkhämkiea veia pi kyase, Sinai mcunga ngthuheipüikia khankhawngsäa veia pi kyase, ja mjükphyüi nakiea veia pi kyase ve lü mimi a jah pet vaia xüngseiki Pamhnama ngthu yahkia kyaki.

³⁹ Ania ngthu cun mi pupae naw käh ngai u lü, ami mlung üng Egypt pea nghlat be vai ngjahlükie.

⁴⁰ Acunakyase Arona veia, 'Ja ngkhahpüi khaia mhnam he jah pyan peta; Egypt pe üngka naw jah lawpüikia Mosi ihawkba veki ni am ksing ve üng' ami ti.

⁴¹ Acunüng, seca juktuh pyang u lü, acun cun xüngsei hnimki he naw hjawkhah u lü, amimäta kuta pyang cun ngkengtai u lü hlimtuikie.

⁴² Acunakyase Pamhnam naw akcea ja jah nghlat ta lü, khankhawa aisie jah hjawkhah

7:36 Ex 7:3; Ex 14:21; Num 14:33 **7:37** Deut 18:15,18 * **7:37** ani kei a na tüih lawa kba; am ani üngkeia kba. **7:38** Ex 19:1—20:17; Deut 5:1-33 **7:40** Ex 32:1 **7:41** Ex 32:2-6 **7:42** Amo 5:25-27 (LXX)

khaiea a jah pawh; acun cun sahmaea yuknak
caup üng:

‘Isarel khyange aw, khawkhyawng khawa kum
kphyükip üng
axüngksei jah hnim u lü ngkengnak nami
bilawh hin kei nami
na hjawkhahnak am ni.

⁴³ Sama k'uma vekı Moluk mhnım ceı hü lü
aisi mhnım
Rephan pi nami hjawkhah vaia a lup nami
pyangki, acunakyase,

Babalung pea nami mpya khaia ka ning jah tüih
khai' tia vekı.

⁴⁴ Mi pupae naw khawkhyawng khawa Mh-
nama venak vai sam takie. Acun cun Mhnama
phäh nami pyan vai cun Mosi üng mtheh kba
sam nami takie.

⁴⁵ Acun kána, mi pupaea naw sam cun lo u
lü Josuh mah maha cit u lü cehpüikie, acun cun
Pamhnım naw ni maa a jah ksät khyangmjüea
khawa takie. Acun hin Davita a ve law căpa acua
veki.

⁴⁶ Acuna Davit cun Pamhnama mpyeneinak
yah lü, Jakopa Pamhnama venak vai pyang khaia
kthähki.†

⁴⁷ Acunsepi, Solamon naw ni im cun a sak.

⁴⁸ Acunsepi, hlüngtai säihkia Mhnım cun
khyanga kut am saka im üng am ve khawi;
sahma naw pyen lü:

⁴⁹ Bawipa naw, ‘Khankhaw cun ka
Bawingawnaka kyaki, khawmdek cun ka

7:44 Ex 25:9,40 **7:45** Jos 3:14-17 **7:46** 2Sam 7:1-16; 2Kbro
17:1-14 † **7:46** Jakopa Pamhnım; avang yuknake üngIsarel
khyange. **7:47** 1Sang 6:1-38; 2Kbro 3:1-17 **7:49** Hesa 66:1,2

khawppha ka mtaihna ka kyaki, im ia mäih nami na sak hlü peki ni? Ka venaka hnün cun ia mäih ni?

⁵⁰ Kamäta kut am anaküt ka ja mhnünkia am kya aw? ti ve, ti lü a pyen ni.

⁵¹ Stephen naw msu lü, “Nami mlung ngcang ve, Pamhnama ngthu am nami ngjaki, anglät se Ngmüimkhya Ngcim nami mahki; nami pupaea ve ja nami ve täng ve.

⁵² Nami pupae naw sahmae am ami khuimkha khawi veki aw? Law khaia Ngsungpyunkia Mpyaa mawng sang lawki he Pamhnama ngsä he jah hnimki he. Atuh pi ani cun phyehei lü nami hnimki.

⁵³ Mhnama thum, khankhawngsä hea naw ami ning jah pet cän yah u lü am nami läki” a ti.

Stephen lung am ami khawngnak

⁵⁴ Acunüng, acuna ngthu cun kawngci khyange naw ami ngjak ja ami mlungso law se, Stephen khana mnicui kyetkie.

⁵⁵ Acunsepi, Stephen cun Ngmüimkhya Ngcim am beka kya lü, khankhawa hang mangki naw, Pamhnama hlüngtainak ja Pamhnama khet lama Jesuh ngdüi se a hmu.

⁵⁶ Acunüng, Stephen naw, “Teng u.” “Khankhaw nghmawng lü Pamhnama khet lama Khyanga Cakpa ngdüiki pi hmu veng” a ti.

⁵⁷ Amimi cun angsanga ngpyang u lü, ami nghnga jah kbümeikie naw, atänga kyaksih u lü,

⁵⁸ mlüh k'um üngka naw akpunga kaih u lü, lung am ami khawng. Saksi vai ami suisake cun

Sawluh ngming naki cawngpyang mata khaw kunga ami jah tak.

⁵⁹ Acunüng, lung am aktäa ami khawng k'um üng, Stephen naw, "Bawipa Jesuh aw! ka Ngmüimkhya labea" ti lü ktaiyüki.

⁶⁰ Acunüng, a mkhuk ngdäng lü, angsanga ngpyang lü, "Bawipa aw, hina ami mkhyekatnak cân kah ja thung be kawpi" a ti. Acuna ngthu a pyen päng ja thiki.

8

¹ Sawluh naw Stephen ami hnim vai jah tängpüiki.

Sawluh naw sangcime a jah mkhuimkha

Acuna mhnüp üng Jerusalem mlüha vekie sangcim cun aktäa mkhuimkhanak kham lawki he; acunakyase, Ngsäe däk ve hüt u se, jumeikie naküt cun Judah ja Samarih hnea ngpyeng hükie.

² Acunüng, Pamhnam jumkie naw, Stephen cun k'ut u lü, aktäa ami kya.

³ Acunüng, Sawluh naw sangcime aktäa a jah khuimkha, im naküt üng lut hü lü jumeikia nghnumi kpamie jah man lü jah kaih hü lü, thawngim üng a jah khyum.

Samarih hnea thangkaw sangnak

⁴ Acunüng, pyeng hükia jumkie naw hne naküt üng cit u lü ngthu pyen hükie.

⁵ Philip cun Samarih hnea mlüh* ktunga ju citki naw, Mesijaha mawng khyange veia a ju pyen.

⁶ Khyange naw, ngja u lü Philip naw a mdana münkam phyaki he ami jah hmu üng, a ngthu pyen cun aktäa ami ngaih.

⁷ Isetiakyaküng, khawksea jah venake ami k'um üngka naw khawyaie ngpyang u lü lut lawki he. A khaw kceke ja xokie pi ami daw law bea phäha kyaki.

⁸ Acuna mlüh üngkae cun aktäa jekyaikie.

⁹ Sihmon ngming nakia khyang mat veki; ani naw, ajana acuna mlüh üng, sui pawh lü Samarih khyange jah cäicatsak khawikia kyaki. "Kei cun khyang sawxat am ni" a ti.

¹⁰ Mlühä veki naküt khyang akdik akdäm naküt naw "Ani hin 'Hlüngtaikia Johit' tia ngthangkia Pamhnama Johit ni" ti lü a ngthu pyen cun mcek lü ngaikie.

¹¹ A sui bilaw am, aksoa cäicat kphyaki he a ja bilawh khawha phäha, a ngthu cun aktäa ami münnak.

¹² Acunsepi, Pamhnama pe thangkdaw ja Jesuh Khritawa ngming thangkdaw Philipa pyen ami jum ja, ngnumi kpami Baptican khan lawki he.

¹³ Sihmon naw pi jum law hnga lü Baptican a kham law päng ja Philipa hlawnga ve lü, münkamkse ja münkamnak a jah pawh cun hmu lü cäiki.

¹⁴ Acunüng, Jerusalema vekia Ngsäe naw Samarih hnea khyange naw pi Pamhnama ngthu

* **8:5** mlüh ktung; avang yuknake üngmlüh.

junkie tia ami ksing law üng, ami veia Pita ja Johan ami jah tüih;

¹⁵ acu xawi ani ju pha üng, Ngmüimkhya Ngcim ami yahnak vaia ami jah ktaiyü pet.

¹⁶ Am acun ham üng ta ua khana Ngmüimkhya Ngcim am pha law; Bawi Jesuha ngming am Baptican däk va khan hamkiea kyaki.

¹⁷ Angsä xawi naw ami khana ani kut taih ni se, Ngmüimkhya Ngcim yaheikie.

¹⁸ Acunüng, Ngsäea kut taiha phäha Ngmüimkhya Ngcim pha lawki ti cun Sihmon naw a hmuh. Acunüng ngui cun Pita ja Johana veia lawpüiki naw,

¹⁹ “Kei pi, khyange khana ka kut taih ngüse, Ngmüimkhya Ngcim ami yahnak thei vaia johit na pe nia” ti lü a jah kthäh.

²⁰ Pamhnama bähäknak cun a ngui am khyäi khaia a büa phäha, Pita naw, “Na xünak ja na ngui mulaia cit ni se,

²¹ na mlung Pamhnama hmaia käh ngsung-pyunkia kyase, hin üng käh na ngpüi hngaki, na ham pi am ve;

²² acunakyase, na mkhyekatnak ngjut lü Bawipa veia ktaiyüa, acunüng, na mlung üng na ngaihnak ni mhlät khai ni.

²³ “Nang cun püi ng’eihnak am bebang lü mkhyekatnaka thawng kyuma na kyaki ti ksing veng” a ti.

²⁴ Acunüng, Sihmon naw, nani pyen ka khana am a pha lawnak vaia, nangni naw Bawipa veia na ktaiyü pe nia” ti lü Pita ja Johan a jah mtheh.

25 Acunüng, ani xawi naw saksi ja Bawipa ngthu ami ksingsak käna, Jerusalem mlüha citbeki xawi. Ani ceh sawa Samarih ngnam khawhah üng Thangkdaw sangki xawi.

Philip ja Ethiopia ngvai

26 Bawipaa khankhawngsä mat naw Philipa veia, “Tho law lü Jerusalem üngkhyüh Kaza khawa cehnaka† lam üng cita” a ti (Acuna lam cun tuh ta am sumei ti u.)‡

27 Acunüng, tho law lü citki. Acua Ethiopia khawa Candace, Ethiopia upki nghnumia khawthem naküt msümcei lü nghnumi awmki cun Jerusalem khawa Pamhnam va hjawkhah khaia citki;

28 a nglat law be lama, a senghlea khana ngaw lü sahma Hesajah cauk üngka kheki.

29 Acunüng, Ngmüimkhya naw Philipa veia, “Cana senghle veia cit lü a hlawnga va vea” a ti.

30 Acunüng, Philip cun acuna ngvaia veia va cit lü sahma Hesajaha cauk khe se ngjaki naw, “Na khea asuilam na ksingki aw?” a ti.

31 Ani naw, “U naw am a na mtheh cun ihawkba ka ksing thei khai ni?” a ti. Acunüng, a veia ngaw hnga khaia Philip cun a khü.

32 Acunüng, Cangcim a khe cun:

“Hnim vaia toa mäiha ani cun ami cehpüi; To a mu ami kteih üng käh khihkkeh lü a vea mäiha, ani pi käh khihkkeh lü veki;

† 8:26 acum; am ani üngmhnüp nglung. ‡ 8:26 ahina lam tuha am sumei ti u; am ani üngahin hin khawkhyawng lam ni. 8:32 Hesa 53:7,8 (LXX)

³³ Ani cun hnemnak a khamei üng, am cangkia lei ami mtai pet; u naw pi a mjükphyüi mawng am pyen khawh u, isetiakyaküng khawmdeka ania sak cun päihki” kyaki.

³⁴ Acunüng, ngvai naw Philipa veia, “Sahma naw hin hin ua mawng ni a pyen? Amäta mawng mä, khyang kcea mawng mä? Ni kthäh veng na mtheha” a ti.

³⁵ Philip naw, thangkdaw cun ahina Cangcim üngkhyüh tünei lü Jesuha mawng cun a mtheh.

³⁶ Acunüng, lam ani ceh k'um üng, tuia venak pha ni se; ngvai naw, “Tenga, hin üng tui ve ve, Baptican kham vaia i naw na kyawhki ni?” ti se,

³⁷ Philip naw, “Na mlungmthin avan am na jumei üng na kham theiki” ti se; ngvai naw, “Jesuh Khritaw, Pamhnama Cakpaa kyaki ti ka jumki” ti lü a msang.

³⁸ Acunüng, angvai naw senghle ngdüihsak lü, Philipa dä ngvai cun tui da citki xawi. Acun üng Philip naw Baptican a khamsak.

³⁹ Acunüng, tui üngka naw ani thaw law be ja, Bawipaa Ngmüimkhya naw Philip cun cehpüi. Angvai naw Philip am hmu ti kyaw lüpi jekyainak am amäta lama citbeki.

⁴⁰ Acunsepi, Philip cun Azuk mlüha ngdang law be lü; a ceh sawa acuna mlüh üngkhyüh Ketarih am a pha hama küt üng, mlüh naküt üng thangkdaw sang hüki.

9

Sawluha ngthunghlainak
(Ngs 22:6-16; 26:12-18)

¹ Sawluh naw Bawipa hnukläk jah mkyüh lü jah hnim khaia ngbüki naw,

² Bawipa tuilam kläklamkie nghnumi kпамie naküt jah khit lü Jerusalema a jah lawpüi vaia, Damatet mlüha sinakoka veki am ca a ja pet vaia Jerusalema ktaiyü ngvaia veia kthäh khaia citki.

³ Acukba cit lü Damatet mlüh pei a pha law üng, khankhawa ka akvai cun angxita a peia vai law sawxatki.

⁴ Acunüng, Sawluh mdeka khana kyu lü, “Sawluh, Sawluh, i vai na na mkhuimkhaki ni?” tia kthai a ngjak.

⁵ Sawluh naw, “Bawipa, nang u ni?” a ti. “Na mkhuimkha Jesuha ka kyaki ni; tia kthai a ngjak.

⁶ Acunsepi tho law lü mlüh da cita, acunüng na pawh vai ni mthet khaie ni” a ti.

⁷ Acua a hlawnga cit hngakie naw kthai ngja u sepi, u am hmu u.

⁸ Sawluh cun mdek üngka naw tho law be lü, hang mangki naw ipi am hmu thei se, a kut üng kaih u lü, Damatet mlüha ami cehpüi.

⁹ Mhnüp kthum khawdei am hmu lü i am eiaw lü veki.

¹⁰ Acunüng, Damateta Anani ngming naki axüisaw mat veki. Pamhnam naw a ngmang üng, “Anani” a ti. Ani naw, “Bawipa aw, hia ve veng” a ti.

¹¹ Bawipa naw a veia, “Tho law lü, lam ngdüng ami tia lama cita, Sawluh naki Tasuh mlüha ka Judaha ima va sua; acua ktaiyü lü veki ni;

¹² Anani ngming naki naw lut lü a mik a mdeisak be vaia, a khana a kut mtaih se, hmu päng veng” a ti.

13 Anani naw, “Bawipa aw, acun cun, Jerusalem mlüha na khyangea khana a jah mkhuimkhanak, khyang ngcim khawhah mpyawng üng ka ngjaki;

14 acunüng, hia pi na ngming pyenki naküt a jah mannak vaia ktaiyü ngvaiea veia ana yah pängki ni” ti lü a msang.

15 Acunsepi, Bawipa naw, “Cita, Khyang-mjökcee, sangpuxange ja Isarel khyangmjökcee venaka ka ngming chepüi khaia ka xü ni.

16 “Ka ngminga phäha mkhuimkhanak ih-lawka khamei khai tia ka ksing lawsak khai” a ti.

17 Acunüng, Anani cun va cit lü Sawluha venak ima lutki; a khana a kut mtaih lü, “Ka na Sawluh aw, na mika hmuhnak be vai ja Ngmüimkhya Ngcim am na benak vaia, na law lama Bawipa na veia ngdangki Jesuh naw a na tüih law ni” a ti.

18 Acunja, a mik üngka naw ngalipa nglawh lawa mäiha nglo law lü, a mik mdei law beki; acunüng, tho law lü, Baptican khanki.

19 Acunüng, a ei päng ja, aktha ve law beki.

Damateta Sawluh naw ngthu a pyen

Acunüng, Damatet khawa veki axüisawea veia asäng veki.

20 Sinakoka cit täih lü, Jesuh cun Pamhnama Cakpa akyaka mawng sangki.

21 A ngthu pyen ngjaki naküt naw cäi u lü, “Hin hin, Jerusalem mlüha hina ngming pyenki naküt ja khuimkha khawikia am kya ai se? Acune cun jah khit lü ktaiyü ngvaiea veia a jah chepüi vaia lawki ni” ami ti.

²² Acunsepi, Sawluh cun a pyen johit am be law lü, Damateta vekia Judahea pyen naküta ngthu ja msang lü, Jesuh cun Khritaw kcanga akyaka mawng a jah mtheh.

²³ Acunüng, asäng nghjawk se, Sawluh hnim khaiea Judahe nghmu u lü cengkie.

²⁴ Acunsepi, Sawluh naw ami ceng a ksingei. Sawluh hnim khaiea bü u lü mkawte cun amhnüp mthana ami jah ngnäng.

²⁵ Acunsepi, axüisawe naw chepüi u lü mthana vawh üng takie naw ngvawng üngkhyüh ami ju khyak.

Jerusalem mlüha Sawluh

²⁶ Acunüng, Sawluh naw Jerusalem mlüh a pha ja, axüisawe jah ngdawn hüpüi se, axüisawa kya hngaki ti am jum u lü ami van naw ami kyühei.

²⁷ Banabah naw ngkhahpüi lü axüisawe veia lawpüiki naw, lama Bawipa hmu se a ngthuheipüia mawng, Damatet khawa am kyühei lü Jesuha ngming am ngthu a pyena mawng cun a jah mtheh.

²⁸ Acukba Sawluh cun Jerusalem khawa ami veia cit hü lü Bawipa ngming am ling lü ngthu pyenki.

²⁹ Krik khyü pyenki Judahea veia ngthu pyen se, ngcupüikie naw, hnim khaie a ami bü.

³⁰ Acunüng, Jumeikie naw ami ksing law üng, Ketarih khawa chepüi u lü Tasuh khawa ami tüihin u.

31 Sangcime cun Judah, Kalile ja Samariha dim'yenak am vekie; acunüng, Ngmüimkhya Ngcim naw ngjuk ktha jah pe lü khyang nung law u lü Bawipa cun aktäa kyühkie.

Pita ludah mlüh ja jukpei mlüh

32 Pita cun hnün naküt üng cit hü lü Ludah mlüha vekie Mhnama khyangea venaka ju citki.

33 Acua khyang mat, Eni ngming naki, xo lü kum khyet a ihnak üng ngjänki a hmu.

34 Pita naw, "Eni, Jesuh Khritaw naw ning mdaw be ve; tho law lü na ngjännak pyanga" ti se, acun üng, angxita tho lawki.

35 Ludah mlüh ja Saron mlüha vekie naküt naw, Eni hmu u lü, Bawipa veia nghlatkie.

36 Jukpei mlüh k'uma Tabitah ngmingnakia nghnumi mat vekie. A Krik ngming cun Dorka naki, 'Sa khyuk' tinaka kyaki. Acuna nghnumi cun jumei lü, akdaw bilo lü, aktäa petmsawkia nghnumia kyaki.

37 Acunüng, ani cun am mya lü thi se, a yawk cun mthi u lü ima khana ami mphän.

38 Acunüng, Ludah mlüh cun Jukpei mlüh khyüh am thuk, axüisawe naw Pita acua vekie tia ami ksing üng, "Käh sü lü, kami veia law kawpi" tia nghui na khaia, khyang nghngih ami jah tüih.

39 Acunüng, Pita cun tho law lü, ami veia cit haki. A pha ja khan ima ami cepüi; hmeinu naküt cun a peia ngdüi u lü, Dorka naw ami veia a ve ham üng a jah pyana kcue ja jihe jah büktengsak u lü kyapkie.

40 Acunsepi, Pita naw ami van kpunga ja lu lawsak lü a mkhuk süm lü ktaiyüki; yawk da

nglat lü “Tabitah, tho law” a ti. Acunüng, mdei law lü, Pita a hmu ja tho law lü ngawki.

⁴¹ Acunüng, Pita naw a kut säng lü mthoki naw, jumeikie ja hmeinue jah khü lü, akxünga a jah mhnuh.

⁴² Acun cun Jukpei mlüh üngkae ami van naw ngja u lü khyang khawha naw Bawipa jumkie.

⁴³ Pita cun Jukpei mlüha mhnüp khawvei savun pyangki Sihmona ima veki.

10

Pita ja Konelih

¹ Acunüng, Ketarih khawa Konelih ngming naki Romah cetca keptin veki, acun cun Itali yekap ngvai ami ti.

² Ani cun Pamhnam üng hlimtui lü, a ima veki ami van naw Pamhnam kyühkie, mpyenkseki Judah khyange jah petmsawt lü aktää ktaiyüki.

³ Acuna, mhnüp mülam naji kthum bang üng, Pamhnama khankhawngsä mat law lü, “Konelih aw” ti lü ngkhü lawki cun angsing hmumkthehnak a hmuh.

⁴ Acunüng, Konelih naw a kyühnak am bükteng lü, “Bawipa aw, ini?” a ti. Acunüng, ani naw, “Na ktaiyünak ja na petmsawte naw Pamhnam jesak se, Pamhnam naw na ktaiyünak ning msang khaia kyaki.

⁵ “Tuhkbäih Jukpei mlüha khyang ja tüih lü khyang mat Sihmon Pita ngming naki jah khüsaka;

⁶ savun pyangkia Sihmona veia kaiki ni, a im cun mliktui peia veki ni” a ti.

⁷ Acunüng, ngthuheipüikia khankhawngsä a ceh be ja, Konelih naw a mpya üngka nghngih ja, anglätse khüikie üngka Pamhnam üpnaki yekap mat khü lü;

⁸ ngthu a jah mthoh päng üng Jukpei mlüha a jah tüih.

⁹ Angawi üng, ami ceh lam mlüh pei ami pha law hlü üng, Pita cun ktaiyü khaia im mkhyuma kaiki.

¹⁰ A ei naw mcawi law se, bu ei law hlüki; cunsepi, a ei vai ami pawh k'um üng Mhnama mdannak a hmuh.

¹¹ Khankhaw nghmawng law lü jihnuia mäiha kphyüa kitmaki mdeka kya lawse a hmuh.

¹² Acuna k'uma, khawmdek üng ngvak hükiea khisa avan ja khankhawa khae naküt veki.

¹³ A veia kthai pha lawki cun, “Pita aw, tho law; ja hnim lü jah eia” a ti.

¹⁴ Acunsepi, Pita naw, “Bawipa aw, acukba am kya; am ngcimcaiki ja mtükheh i am ei khawi veng” a ti.

¹⁵ Acunüng, Khana kthai naw anghnginaka, “Pamhnam naw a ngcimsak päng nang naw am ngcimcaiki käh tia” a ti.

¹⁶ Acukba cia kthum vei ngdang law lü; acunüng acuna jiha mäih cun khankhawa a ju jäh law be.

¹⁷ Pita naw mdannak a hmuh cun asuilam am ksing lü ana ve k'um üng, Koneliha a tüiha khyange naw Sihmona a im ngthäh law u lü mkawt peia ngdüi lawki he.

18 Sihmon Pita ngmingnaki khin cun, acua a pha ja am a pha ngpyang u lü ami ju kthäh.

19 Acunüng, Pita naw mdannak a hmu cun, a ngaikyu hui üng, Ngmüimkhya Ngcim naw a veia, “Ngaia, khyang kthum* naw ning sui hü ve u.

20 Acunakyase, tho law lü ju kyuma, käh cücawn lü jah läka; anini cun keia jah tüih law ni” a ti.

21 Acunüng, Pita cun, acunea veia kyum lü ami veia, “Nami sui hü hin kei ni; ia phäha nami lawki ni?” a ti.

22 Amimi naw, “Konelih, yekap ngvai, khyang kdaw, Pamhnam kyühki, Judah khyange naküt üng ngming dawnak yaki naw a ima nang ning khü lü na ngthu pyen ngai khaia, Pamhnama khankhawngsä mat naw a mtheha kyaki” ami ti.

23 Pita naw, acuna khyange cun im k'uma ja luhpüi lü a jah khinnak. A ngawia Pita cun tho law lü ami veia cit se, Jukpei mlüha ka, jumeikie avange pi a veia cit hngakie.

24 Angawi be kce üng, Ketarih mlüha phakie. Acuia, Konelih naw a khyange ja a püie ja khü lü, anini cun ami jah na k'äih.

25 Pita a pha law üng, Konelih naw ana dokham lü a khaw kunga mbawki.

26 Acunsepi, Pita naw ani cun mtho lü, “Ngdüia, kei pi nghngicima ni ka kya ve” a ti.

27 A veia a ngthuhei maha va lut lü khyang khawha ana ve se a hmu.

* **10:19** Kthum; cangcim avang üngtaavang; cangcim mat naw tanghngih.

28 Ami veia, “Judah khyang naw khyang-mjückce ngkhawtpüi lü ami veia a ceh hü vai käh nglawiki tia nami ksingki; acunsepi, ‘U pi am ngcim, phyawksak ve’ käh ka ti vaia, Pamhnam naw na mtheh pängki ni.

29 Acunakyase, na na khü law ja, käh dam lü ka lawkia kyaki. Acunakyase ka ning jah kthäh khai, “Ia phäha nami na khü lawki ni?” a ti.

30 Konelih naw, “Ahin kcün mhnüp kthum anghjawk üng, ka ima naji kthum üng ka ktaiyü† k'um üng; khyang mat suisak bawk suisa lü, ka maa ngdüi lawki naw,

31 ‘Konelih aw, na ktaiyünak Pamhnam naw ngja ve, na petmsawt ja na bilawh naküt pi Pamhnam naw ksing ve.

32 Acunakyase, Jukpei mlüha khyang tüi lü Sihmon, Pita ami ti cun, na veia khüa; ani cun mliktui pei, savun pyangki Sihmona ima kaiki ni’ a ti.

33 Acunakyase, na veia khyang angxita ka tüih lawa kyaki; na law hin daw ve. Acunakyase, Bawipa naw ngthu aning mtheh naküt ngai khaia, atuh Pamhnama hmuha kami van hin üng kami veki” a ti.

Pitaa ngthupyen

34 Pita naw pyen lü, “Pamhnam naw, khyang naküt atänga jah mceiki tia akcanga ka ksingki;

35 acunsepi, au pi amät hjawkhah lü akdaw pawhkia khyang mjü naküt cun mkhawihnga lü jah dokhamki.

† 10:30 ktaiyü; cangcim avang naw taei jeih ja ktaiyü. 10:34
Deut 10:17

36 “Ani naw, acuna ngthu cun nami ksingki, acun hin Jesuh Khritaw üngkhyüh dim’yenaka thangkdaw Isarel veia a peta kyaki. ‘Jesuh cun khyang naküta Bawia kyaki’ tia nami ksingki.

37 Johan naw Baptican khamnaka mawng ngthu a pyen käna, Kalile üngkhyüh cutei lü Isarel khaw naküt üng ngthu ngthang hükia münkse bilawhnake cun nangmi naw pi nami ksingki;

38 Nazaret Jesuha mawng ta ania khana Pamhnam naw Ngmüimkhya Ngcim ja johit am a besak; ani cun Pamhnama veia vekia kyase, khyanga khana akdaw pawh lü khawyaia jah khuimkhae naküt jah mdaw be lü cit hüki.

39 Judahea khaw ja Jerusalem mlüh a jah bilawh naküt kami saksinaki; ani cun kutlamktung üng taih u lü, ami hnim.

40 Pamhnam naw amhnüp thum üng mtho be lü a ngdangsak,

41 acunsepi, khyang naküta veia am kya lü, keimie kami saksi khaia Pamhnam naw a jah xü, thihnak üngkhyüh a thawh be käna amät am atänga eiaw yüm khaia a jah mthoh ni.

42 Acuna Bawipa cun akthie ja akxüng hea khana ngthumkhyah khaia Pamhnam naw a mcawna kyaki tia, khyangea veia sang hü khaiea, jah ksing hüsak khaiea, Pamhnam naw ngthu a jah pet.

43 A u pi, ani jumeiki naküt, a ngminga phäha a mkhyekatnak mhlättnak yah khai tia, ania mawng cun sahmae naküt naw ami sang khawi ni” a ti.

Khyangmjükcee naw Ngmüimkhya Ngcim yahkie

⁴⁴ Pita naw acuna ngthu a pyen hui üng, ngthu ngjakie naküta khana, Ngmüimkhya Ngcim pha lawki.

⁴⁵ Pitaa veia law hngakie Judah jumeiki khyange naw, khyangmjükceea khana pi Pamhnam naw Ngmüimkhya Ngcim a pha lawsak hmu u lü cäikie.

⁴⁶ Käh ksinga ngthu am ngthuhei u lü Pamhnam mhlünmtai u se, ami jah ksinga phäha kyaki. Acunüng, Pita naw jah msang lü,

⁴⁷ “Hine, mimi mäiha Ngmüimkhya Ngcim yah hngakie cun tui üng Baptican am khan khaiea, u naw a jah khyawh ni?” ti lü,

⁴⁸ Jesuh Khritawa ngming am Baptican khan khaiea a jah mtheh. Acun käna Pita cun ami veia asäng ve khaia ami nghuinak.

11

Jerusalem sangcimea veia Pitaa khyü cük

¹ Judah khawa vekiea Ngsäe ja jumeikie naw, khyangmjükcee naw pi Pamhnama ngthu ja hngakie tia ami ksing.

² Acunüng, Pita Jerusalema a ceh üng, vun mawi hlükie khyangmjükcee naw pi Pita cun kcäh u lü,

³ “Ami vun am mawikiea ima lut lü ami veia na ei haki” ti u lü ami ngcuhpüi.

⁴ Acunsepi, Pita naw aphung üng tünei lü ja mthehki naw,

⁵ “Jukpei mlüha ktaiyü lü ka veki; acunüng, jinua mäih üng khankhawa ka naw kya law se ka hmu; ka pei yea na k’et lawki;

⁶ acun bükteng lü ka ngaikyu hui üng, khisae naküt khawmdek üng ngvak hükie ja khana khae ka jah hmuh.

⁷ Acunüng, kthai naw, ‘Pita, tho law, jah hnim lü ja eia’ ti se, ka ngjak.

⁸ Acunsepi, kei naw, ‘Bawipa aw, acukba am kya, am ngcimcaiki ja mtüikheh ka mka üng am ju lut khawi naw’ ka ti.

⁹ Acunsepi, khankhawa ka kthai naw, ‘Pamh-nam naw a ngcimcaihsak haw cen, nang naw am ngcimki käh tia’ ti lü a na msang.

¹⁰ Acukba kthum vei a ve law päng üng, avan khankhawa a jähei be.

¹¹ Acunüng, khyang kthum, Ketarih mlüha kae cun ka veia jah tüi law u se, ka venaka ima pha lawki he.*

¹² Ngmüimkhya naw käh cücawn lü ka ja läk khaia a na tüih. Hina jumeiki khyuke naw pi na läk law hnga u se, Koneliha ima kami lutkie;

¹³ ani naw, a ima khankhaw ngsä ngdüi se a hmuh ja, khankhaw ngsä naw a veia, ‘Jukpei mlüha khyang tüi lü, Sihmon Pita ami ti jäng laksaka;

¹⁴ ani naw ngthu ning mthet se, acuna ngthu am nang ja na khui im kyawnglawng cun küikyana nami kya khai’ a tia mawng a jah mthet.

* **11:11** Kei,cangcim avang üngtakeimi.

15 Acunüng, ngthu cutei lü ka pyen law ja, Ngmüimkhya Ngcim akcüka mi khana a pha lawa mäiha, amimia khana pi pha lawki.

16 Acunüng Bawipa ngthu, 'Johan naw tui am khyang Baptican jah peki, acunsepi nangmi cun Ngmüimkhya Ngcim üng Baptican nami khan khai' a ti, ka süm law beki.

17 Pamhnam naw Bawipa Jesuh Khritaw mi jumei ja, amdanga a jah peta khawh cun khyangmjü kcee pi acuna khawh a jah pet hnga üng, kei cun ia kya lü acuna Pamhnam ka ma khai ni?" a ti.

18 Acuna ngthu ami ngjak ja, jum u lü, "Acuna akyaküng, Pamhnam naw khyangmjükcee haw ngjut be u lü xünnak ami ya vaia mawng cun ja pe ha ve" ti u lü Pamhnam mküimtokie.

Antiok mlüh üngka sangcim

19 Stephena phäha ami jah khuimkhae, Phonisia, Kuparuh ja Antiok mlüh cäpa dawng hü u lü Judah khyange dänga veia Pamhnama ngthu sang hükie.

20 Acunsepi, avange cun Kuparuh mlüh ja Kuriniha kaea kyakie, acune naw Antiok mlüh ami pha üng, khyangmjükcee[†] veia pi ngthu pyen u lü, Bawipa Jesuha thangkdaw ami sang.

21 Bawipa johit naw jah vepüi se; khyang khawhah naw jum u lü, Bawipa veia nghlat law päihkie.

11:16 Ngs 1:5 11:19 Ngs 8:1-4 † 11:20 Khyangmjükcee; cangcim avang üngtaKrik pyenkia Judaheam ani üngKrik pyenkia khyange.

²² Ami mawngma cun Jerusalema veki sangcim naw ngja u lü, Banabah cun Antiok mlüha ami tüih.

²³ Banabah a va pha üng, Pamhnama jah pet dawkyanak hmu lü aktäa jeki, ktha na kcang u lü Bawipa üng anglät se ami khäng vaia ami van a jah mcäi.

²⁴ Banabah cun khyang kdawa kya lü, Ngmüimkhya Ngcim ja jumeinak am bekia kyase, Bawipa veia khyang khawhah ngdawn lawki he.

²⁵ Acunüng, Banabah cun Sawluh sui khaia Tasuh mlüha citki.

²⁶ Va hmu lü Antiok mlüha a cehpüi. Kum mät bang Sangcim üng veki khyange am hmu hnga ni lü, khyang khawha ja mtheimthangki xawi. Acuna Antiok mlüha jumeikie cun “Khritjane” tia ami jah sui law kcüka kyaki.

²⁷ Acuna kcün üng, sahma avange cun Jerusalem üngka naw Antioka ju citkie.

²⁸ Amimi üngka mat, Akabas ngming naki ngdüi law lü khawmdek khan avan üng khawjaw law khai tia Ngmüimkhya Ngcim am a pyen; acuna khawjawnak cun Ketah sangpuxang Kalawdih naw a jah upa kcün üng pha lawki.

²⁹ Axüsawe naw ami khyaih khawha, Judah khawa vekiea jumeikie cun ja kpüikpak vaia ami mkhyah u.

³⁰ Acukba ami büa mäiha ami ja kpüikpaknak cun Banabah ja Sawluha kut üngka naw, sangcim ngvaiea veia ami jah kbi.

12

Mkhuimkhanak khawhah

¹ Acun üng, sangpuxang Herod* naw sangcime üngka avange jah mkhuimkha khaia büki.

² Ani naw Johana be Jakop cun kcim am a hnim.

³ Acun naw Judahe jah jesaki tia ksing lü Pita pi a va man. (Acuna mhnüp cun nghngen am bawikia muk pawhnaka mhnüpa kyaki).

⁴ Acunüng Pita man lü thawngim üng ami khyum, yekap xaleikhyuk am a jah ngängsak; kphyawnpawi a päng üng khyangea veia a cehpüi vaia tängki.

⁵ Acunakyase, Pita cun thawngim üng a tak ham; acunüngpi, sangcime naw Pita cun Pamh-nama veia aktäa ami ktaiyü pet.

Thawngim üngka naw Pita lätki

⁶ Herod naw Pita cun khyange vei am lawpüi hama mthan üng, Pita cun yekap nghngih xawia ani keh üng, mthiyüi nghngih am khit u se ipki; K'äihkie naw pi mkawt peia ve u lü mtätkie.

⁷ Acunüng, Bawipaa khankhawngsä mat ngdang law se, thawngim vai lawki. Acunüng, khankhawngsä naw Pita a kphyeng üng va ksün lü, “Akjanga tho lawa” a ti. Acunüng mthiyüie cun a kut üngka naw nghawk lawki he.

⁸ Acunüng, khankhawngsä naw, “Na khat vawh lü, na khawdawk ngcuma” a ti. Acunüng, Pita naw acukba a pawh. Acunüng,

* **12:1** Sangpuxang Herod: Herod Akaripa I, Palestin upki.
12:4 Ex 12:1-27

khankhawngsä naw, “Na suisake jih lü, na läk law” a ti.

⁹ Pita naw kco law lü a läk; khankhawngsäa bilaw cun akcanga am sui lü a ngmanga a ngaih.

¹⁰ Ngäng kcükie ja anghninaka ngängkie a jah hei khe käna, khawk kpunga luhnak vaia mthiksawh va phaki. Acunüng ksawh amät nghmawng law se, lut law u lü lam mat üng ami va ceh üng, khankhawngsä naw Pita cun a cehtak.

¹¹ Pita naw a ngsüm law ja, “Bawipa naw khankhawngsä tüi law lü, Heroda kut ja Judah khyangea äpeinak üngka naw, a na küikyan akcanga ka ksingki” a ti.

¹² Acunüng, ngaikyu khap lü, Makuh ngming naki, Johana nu Mariha ima va citki. Acua ktaiyü u lü khyang khawha a na ngkhämkie.

¹³ Pita naw ksawh a khawk ja Rode ngming naki mpya naw ngai khaia va citki.

¹⁴ Pitaa kthai a ngjak üng jekyai ngen lü, ksawh pi käh mhmawng lü im k'uma va dawng beki naw, Pita ksawh peia ngdüiki tia a jah va mtheh.

¹⁵ Acunsepi, amimi naw, “Ng’yaw veki” ami na ti. Acunüng, ani naw, “Pita kcang ni” ti lü a pyen. Amimi naw, “Pitaa khankhawngsä va ni vü” ami ti.

¹⁶ Acunsepi, Pita naw, khawk law laihlaih se, ami hmawng üng ta Pita hmu u lü aktäa cäi lawki he.

¹⁷ Acunüng, Pita naw, käh ami khihkheh vaia a kut üng ja kha lü, Bawipa naw thawngim üngka naw a mhlät bea mawng cun a jah mtheh.

Acunüng, “Hina ngthu hin, Jakuk ja jumeikie üng jah va mtheh ua” a ti. Acunüng, va kco lü akcea citki.

¹⁸ Khaw athaih law ja, yekape cun, “Pita hawa vekni ni?” ti u lü aktäa ami lu cingki.

¹⁹ Herod naw Pita a jah suisak, am hmu u. Ngängkie cun jah kthäh lü jah hnim vaia ngthu a jah pet. Acun këna Herod cun Judah khaw üngka naw Ketarih mlüha ju cit lü acua vekni.

Heroda a thiha mawng

²⁰ Turah ja Sidon khaw khyangea khana aktäa a mlung thüi se vekni; acunüng, anini naw bawi im ngängkia khyang, Balatuh cun püi nakie naw, atänga law u lü ngkhawt vaia ami nghuinak, isetiakyaküng, anini cun sangpuxanga khaw üngka eiawk vai ami yaha phäha kyaki.

²¹ Ami xünaka mhnüp üng Herod cun a bawijih jah suisa lü a bawingawhnak üng ngaw lü ami veia ngthu pyenki.

²² Acunüng, khyang naküt naw, “Pamhnama kthai ni, nghngicima kthaia am kya naw” ti u lü ngpyangkie.

²³ Ani naw Pamhnama am leisawngkia kyase, Bawipa khankhawngsä naw kpai se, mkyüt naw ei se thiki.

²⁴ Acunsepi, Pamhnama ngthu cun ngthang hü dämdämki.

²⁵ Banabah ja Sawluh naw khüibi ani bilaw päng üng, Jerusalem üngkhyüh[†] naw nghlat be ni lü Johan, a ngming kce Makuh ngming naki cun ani hlawnga ani cehpüi.

[†] 12:25 üngkhyüh; cangcim avange üngtavai.

13

Banabah ja Sawluh jah xü lü ami jah tüih

¹ Antiok mlüha sangcime üngka, sahmae ja sa-
jae vekie; acune cun Banabah, Simeon (Khyang
le), (Kurinih) khawa ka Lucia, (Herod* jah up-
nakia dä däm lawkia) Manin ja Sawluha kyakie.

² Acunüng, Bawipaa khüibi bi u lü ami ei
ami jeih k'um üng, Ngmüimkhya Ngcim naw,
“Khutbi khai xawia ka jah mcawna Banabah ja
Sawluh cun na jah phyäi hnga ua” a ti.

³ Ami ei jeih u lu ami ktaiyü law päng üng, ani
khana ami kut mtaih u lü, ami ja tüih.

Kuparuh khawa phaki xawi

⁴ Ngmüimkhya Ngcim naw Banabahh ja
Sawluh a jah tüihnak üng Selukih mlüha ju cit
ni lü, acun üngka naw Kuparuh kawnga mlawng
üng citki xawi.

⁵ Acunüng, Salamih mlüha ani pha üng, Ju-
dahea sinakoka Pamhnama ngthu pyenki xawi;
Johan ami tia Makuh pi jah kpüi khaia ani
cehpüi.

⁶ Acuna kyawn avan üng cit hü ni lü, Papos
cäpa cit hüki xawi; acunüng Judah khyang
mat sui khyaihki a ngming Bar Jesuh naw kei
sahmaki tiki ani hmuh.

⁷ Sekijah Pawluh cun Bar-Jesuh a nglawipüia
kyaki. Sekijah Pawluh cun khyang kthema kya
lü Papos kyawn upki kyaki. Ani naw Banabah ja
Sawluh jah khü lü, Pamhnama ngthu ngai hlüki.

* **13:1** Herod: Herod Antipah, Kalile upki (Bük Lk 3:1)

⁸ Acunsepi, sui khyaihki Eluma (Krik ngminga kyaki) naw jah upki cun am jumei khaia, angsä xawi a jah mah.

⁹ Sawluh naki Pawluh ami ti naw, Ngmüimkhya Ngcim am be lü, acuna Bar Jesuh cun büktengki naw,

¹⁰ “Nang khawyaia ca ni, nang cun dawkyanaka ye ni, kpyüpyehnak naküt am na beki, Bawipaa nthukcange hleihlaka nghlatsak khai na ktha naki!

¹¹ “Tukbäih Bawipa kut na khana pha lawki tia ksinga, khawkdei käh na hmu khaia na mik mü khai” a ti. Acun ja Eluma cun nghmüp naw jin se, a kut kha hü lü kaih khai suiki.

¹² Acunüng, kyawn upki naw acun hmuh lü, Bawipa mawng mtheimthangnak cun müna lü aktäa kyühei lü jumeiki.

Pisidih hne Antiok mlüh

¹³ Pawluh cun a ngkhahpüi xawi am, Papos üngka naw mlawng am cit u lü Pampulih hne Parkah mlüha pha u se, acunüng, Johan naki Makuh naw jah cehta lü, Jerusalem da nglat beki.

¹⁴ Acunsepi, anini cun Parkah mlüh üngka naw cit laihlahi ni lü, Pisidih hne Antiok mlüh pha ni lü, acunüng, sabbath mhnüp üng sinakoka lut ni lü ngawki xawi.

¹⁵ Mosia Thume ja sahmaea cae ami khe law Päng üng, sinakok ngvaie naw, ani veia khyang tüih u lü, “Bena xawi aw, khyang nani jah mcäinak vaia ngthu a ve üng pyen nia” ami ti.

¹⁶ Pawluh ngdüi law lü a kut säng lü, “Pamhnam kyühkia Isarele ja khyangmjükcee aw, ngai ua.

17 Hina Isarel khyangmjüe Pamhnam naw, mi pupae jah xü lü, khina kba Egypt pea ami ve üng khyangmjü kdäma a pawh. Pamhnam naw a themnak am Egypt pe üngkhyüh a jah lawpüi be.

18 Kum kphyükip khawkhyawng khawa a jah mcei†.

19 Kanan pea khyangmjü khyüh ja näng lü acun käna acuna pe cun Isarele am a jah kanaksak.

20 Acun käna, sahma Samuilah am a ve law ham üng, ‡kum phyakphyü ja mhmakip ngthumkhyahkie am a jah na pet law.

21 Acun käna sangpuxang mso u se, Benjamina mjü üngka Kisah a cakpa Sawluh ngming naki, khawkum kphyükip ami sangpuxang vaia Pamhnam naw a jah pet.

22 Acun käna ani ksät lü Isarele sangpuxang vaia Davit a mcawn be; Pamhnam naw cuna mawng cun ngsingsak lü, 'Jisea cakpa, Davit, ka mlunga mäi mlung naki hmu veng, ani naw ka ngjakhlü naküt bi khai' a ti.

23 Pamhnam naw khyütam a jah peta mäiha, Isarele jah küikyan khai Davita mjü üngka Jesuh a jah pet,

24 Jesuh naw khutbi, am a tünei law ham üng, Johan naw ami mkhyekatnak nglata u lü

13:17 Ex 1:7; Ex 12:51 **13:18** Num 14:34; Deut 1:31 † **13:18** Ani naw cuneiki; cangcim avang üngtaani naw mceiki. **13:19** Deut 7:1; Jos 14:1 **13:20** Sk 2:16; 1Sam 3:20 ‡ **13:20** Avan naw kum phyakphyü ja mhmakip. Acun käna; am ani üngkum phyakphyü ja mhmakip käna. **13:21** 1Sam 8:5; 1Sam 10:21 **13:22** 1Sam 13:14; 1Sam 16:12; Sal 89:20 **13:24** Mk 1:4; Lk 3:3

baptican ami khan vaia Isarel khyangea veia ngthu a pyen.

²⁵ Johana khut binak a päih law hlü üng, Johan naw, 'U a nami na ngaiki ni? Kei nami ngäng ua am kya nawng. Acunsepi, ngai u, ka hnua law khai khyang ta, kei naw ania khawdawk suh pet khaia pi am nglawi veng' a ti.

²⁶ Abrahama mjü üngka ka püi Isarel khyange ja, hin üng Pamhnam hjawkhah khyangmjükcee aw, hina küikyannaka ngthu cun mi veia a jah kbi lawa kyaki.

²⁷ Jerusalem mlüha vekie ja ami ngvaie naw, Jesuh cun küikyannaka Bawia, am ami ksinga phäha ja sahmaea ngthu sabbath mhnüp naküt üng ami kheh cun am ami ksinga phäha, acuna ngthue cun Jesuh ami mkat üng kümbesakie.

²⁸ A thihnak vai i am hmu u lüpi, Pilata veia hnim vaia msokie.

²⁹ Acunüng, a mawng sahmae naküt naw ami yuk, ami kümsak käna, kutlamktung üngka naw khya u lü lungdüa ami k'ut.

³⁰ Acunsepi, Pamhnam naw thihnak üngka naw a mthawh be.

³¹ Acun käna Kalile üngka naw, Jerusalema a jah chepüi khyangea veia khaw mhnüp khawvei ngdang be se, acune cun atuh Isarel khyangea veia saksikiea kyakie.

³²⁻³³ Keini naw pi, mi pupaea veia khyütam, thangkdaw ka ning jah mthawh lawki ni, acukba

13:25 Jn 1:20; Mt 3:11; Mk 1:7; Lk 3:16; Jn 1:27 **13:28** Mt 27:22,23; Mk 15:13,14; Lk 23:21-23; Jn 19:15 **13:29** Mt 27:57-61; Mk 15:42-47; Lk 23:50-56; Jn 19:38-42 **13:31** Ngs 1:3 **13:32-33** Sal 2:7

Pamhnam naw Jesuh a mthawh benak am, hina khyütam mi cae üng kümsakki, Salan anghng-inak üng pi, 'Nang ka ning cakpaa na kyaki; tungawi na paa ka kyaki' tia ng'yuki.

³⁴ Ng'uh hnüna thukyawnaka käh cit khaia Pamhnam naw ani cun thihnak üngka naw a mthawh be vaia ngthu cun hikba a pyen, 'Davita veia ngcimcaih lü ngsingkia dawkyanak cän nang üng ka ning pet khai' a ti.

³⁵ Acunakyase, Salan kce üng pi, 'Sitihki na mpya a thukyaw vai am tängki' a ti sih.

³⁶ Davit pi, a xün k'um üng Pamhnama ngjakhlü bi a bi këna, thi se, a pupaea hlawnga k'ut u se, lungdüa kyaw pängki ni.

³⁷ Acunsepi, Pamhnam naw thihnak üngkhyüh amthawh be cun acukba am kya.

³⁸ Acunakyase, ka püi Isarele aw, acuna Bawi Jesuh üng mkhyekat mhlätnaka ngthu kami pyen law hin nami ksing vai hlüei veng. Mosi naw am a ning jah mhlät khawh mkhye üngkhyüh ani jumeiki avan cun jah mhlät khawhki.

³⁹ Au pi ani jumeiki naküt cun Mosia thum naw, am a mhlät thei pi mhlät khai.

⁴⁰ Acunakyase, sahmae naw ami pyen cän nami khana käh apha law vaia mcei ua. §

⁴¹ Acun cun, 'Hleihlakkie aw, bükteng ua, cäicing u lü thi ua; bi mat ka kpäng, acun cun khyang naw ning jah mtheh u sepi, nami xüna küt üng am jum uki" a ti.

13:34 Hesa 55:3 (LXX) **13:35** Sal 16:10 § **13:40** Cangcim avang üng am venanga vei. **13:41** Heb 1:5 (LXX)

⁴² Pawluh ja Banabah cun Sinakok üngka naw ani lu law be üng, khyange naw, acuna ngthu cun sabbath bekce üng pi ani pyen be vaia ami jah nguinak.

⁴³ Ngkhämkie ami ngpyen be ja, Judahea ja Judah thuma ngpyawtkie khyangmjükcee naw Pawluh ja Banabah jah läk u se, Pamhnama bähäknak üng ami ve nglät vaia jah mcäiki xawi.

⁴⁴ Acunüng, sabbath betü üng, Bawipaa ngthu ngai khaiea, mlüh üngka avan lawki he.

⁴⁵ Acunsepi, Judahe naw khyange ami jah hmuh üng, aktäa jah cawkei u lü, Pawluha a ngthu pyen cun ngcuhpüi u lü ami ksenak.

⁴⁶ Acunüng, Pawluh ja Banabah naw ling ni lü, “Pamhnama ngthu nangmia veia pyen ma vaia kya kungki; acunsepi, mah u lü anglät xünnak am nami yah vaia nami pawha kya se, Pamhnama a jah ah mcäia mäiha khyangmjükceea veia ning jah nghlatak ve ning.

⁴⁷ Acukba Bawipa naw ngthu a na pet cun, ‘Khawmdeka khütnak cäpa küikyanak na bi khaia, khyangmjükceea phäha akvaia ka ning mcawnki’ tia, kyaki” a ti.

⁴⁸ Acunüng, khyangmjükcee naw acuna ngthu ami ngjak üng je u lü Bawipaa ngthu mhlünmtaikie; acunüng, angläta xüng khaia a xü naküt naw junkie.

⁴⁹ Bawipa ngthu cun acuna khaw avan üng ngthang päihki.

⁵⁰ Acunsepi, Judahe naw mlüh ngvaie ja Pamhnam hjawkhahki khyangmjükcee üngka nghnumie ami jah ksük. Ami naw Pawluh ja Banabah jah khuimkhasak u lü acuna khaw üngka naw ami jah ksät.

⁵¹ Acunüng, ngsä xawi naw ani khawpha üngka mput cun khawk hüt ni lü Ikonih khawa citki xawi.

⁵² Antioka vekia jumeikie cun jekyainak ja Ngmüimkhya Ngcim am bekie.

14

Ikonih mlüha citki xawi

¹ Ikonih pi acukba thawnki, Pawluh ja Banabah cun Ikonih khaw sinakoka lut ni lü ngthu pyen ni se, Judahe ja khyangmjükcee khawha naw jumei lawki he.

² Acunsepi, am jumei hlükiea Judahe naw khyangmjükcee jah ksük u lü, ami cun ami jah hnengsak.

³ Acunakyase, Bawipa üng lingnak am ngthu pyen ni lü, acua khawvei ve ni se, Bawipa naw muncamnak ja cäi phyaki he cun ani kut am jah pawhsak lü, a bänaka ngthu a jah ksingsak.

⁴ Acunsepi, acuna khaw üngkae cun ngpai u lü, avang cun Judahea phäh, avang naw angsä xawia phäh kyaki.

⁵ Acunüng, khyangmjükcee, Judahe ja ami ngvaie naw angsä xawi cun ani hmai se khaia jah pawh u lü, lung am ami jah wawi vaia ami bü law üng,

⁶ acun ksingei law ni lü, Luhkonih mlüh üng Luhtarah ja Derbe ngnam ja a peia ngnamea dawngki xawi.

⁷ Acua thangkdaw cun sang hü laihlahki xawi.

Luhtarah ja Derbea ngthu pyenki xawi

⁸ Luhtarah khawa a hmi law üng tün lü a khaw xokia khyang, am cit hü theiki mat vekki.

⁹ Acuna khyang naw Pawluha a ngthu pyen ngai se, acunüng, Pawluh naw ani cun bükteng kyet lü a dawnak be vaia jumnaq taki ti ksingki naw,

¹⁰ angsanga, “Na khaw am angsunga ngdüi lawa” ti se, ani cun ngtawp law lü, cit lawki.

¹¹ Khyange naw Pawluha a bilaw hmu u lü, Luhkonih khyü üng, angsanga ngpyang lü, “Mhname cun nghngicima mäiha mi veia kyum law ve u!” ami ti.

¹² Banabah cun, “Zutah” tia sui u lü, Pawluh cun ngthu pyenki kyase, “Harmes” tia ami sui.

¹³ Acuna khaw peia vekia Zutah mhnama ktaiyü naw mlüh kpung üngkhyüh se ja paipaie cun luhnaka mkawt peia jah lawpüi lü khyange am ngsä xawia phäh ngkengtainak vaia pawh khaiea ngtängkie.

¹⁴ Acunsepi, Banabah ja Pawluh naw, acun ani ksing law ja, ani suisak ja ktek ni lü, khyangea ksunga dawng ni lü ngpyangki xawi naw,

¹⁵ “Khyange aw, hin hin ivai nami pawhki ni? Keini pi nangmia mäiha nghngicima kani kyaki ni; nangmi naw amdange jah hawih u lü, mce ja khankhaw, tui acunüng vekki naküt jah

mhnün lü, anglät se xüngkia Pamhnama veia nami nghlat lawnak vaia thangkdaw kani ning jah mtheh lawki ni.

¹⁶ Acuna Pamhnam naw ajana khyang naküt amimäta lam üng cit khaiea a jah tüih,

¹⁷ acunsepi, nami khana abänak am eiawk phübe u lü nami jekyai vaia, khankhawa ka naw khaw ak lawsak lü kthiktheih yawpaia dawnak khawkum a ning jah pet ni. Acuna Pamhnam vekü tia ngsingsaki” tia ani pyen.

¹⁸ Acukba pyen lü ami ngkengtainak vaia ami hnim hlü cun ngyan üng ani jah pyaisak.

¹⁹ Acunsepi, Antiok mlüh, pisidih hne ja Ikonih mlüh üngka Judahe avang acua law hngakie naw, khyange jah ksük u se; acuna Pawluh cun lung üng ami khawng, thikia sui u lü mlüh kpunga jäk u lü ami cehpüi.

²⁰ Acunsepi, jumeikie naw ami kcung law ja, Pawluh cun tho law lü mlüh k'uma cit beki. A ngawi üng, ani cun Banabah am Derbe khawa citki.

Siria pe Antioka ani nghlat law bea mawng

²¹ Acuna hne üng thangkdwaw pyen ni lü, axüisawe khawha ani jah yah käna, Luhtarrah, Ikonih ja, Pisidih hne, Antiok mlüha nghlat be ni lü,

²² “Khuikhatnak khawhah khamei lü, Pamhnama pe mi lut khaia kya kungki” tia, jumeikiea mlung ja khängsak ni lü, jumeinak üng ami khängcek vaia ani ja mcäi.

²³ Sangcim naküt üng ngvaie jah mcawn pet ni lü, ei jeih u lü ami ktaiyü law päng üng Bawipa ami ümnak vaia ami jah mtheh.

²⁴ Pisidih hne avan üng cit hü ni lü, Pampulih hnea phaki xawi.

²⁵ Parkah khawa ngthu ani sang päng üng, Ataliha citki xawi.

²⁶ Acunüngka naw mlawng am cit ni lü, Antiok pha law beki xawi, acun cun ani bilawh binak üng Pamhnama mpyeneinak ani yah vaia jah ap ni lü ami jah tüihnaka khawa kyaki.

²⁷ Antiok ani pha ja sangcime jah ngkhämsak ni lü Pamhnam naw jah summangei lü khut ani bi naküte ja, khyangmjükcee phäha pi jumnaaka ksawh a mhmawnga mawng cun ani jah mtheh.

²⁸ Acunüng, jumeikiea veia khawvei veki xawi.

15

Jerusalema ngcunnak

¹ Khyang avange cun Judah khaw üngka naw Antioka law u lü, “Mosia thuma mäiha nami vun am nami mawih üng küikyannak am nami yah khai” tia, jumeikie ami jah mthei.

² Acune am Pawluh ja Banabah cun aktäa ngcuh u se, Pawluh ja Banabah cun angsä avange am, acuna ngthua phäha, Jerusalema vekiea Ngsäe ja sangcim ngvaiea veia hang cit khaiea ami mkhyäp.

³ Sangcime naw jah tha u se, ani naw khyangmjükcee ami nghlat law bea mawng cun Phonisia ja Samarih avan üng cit hü ni lü ani pyena kyase, jumeikie naküt ani jah jesak.

⁴ Jerusalem ani jäng pha üng, sangcime, Ngsäe ja, sangcim ngvaie naw jah na je na u se,

Pamhnam naw a jah summangei naküt ani jah mtheh.

⁵ Acunsepi, Pharisee üngka, jumeiki avange tho law u lü, “Khyangmjükcee naw ami vun ami mawi vaia kyaki, Mosia thum pi ami läk vaia jah mtheh vai” ami ti.

⁶ Ngsäe ja sangcim ngvaie cun, acuna ngthu ngai khaiea ngcunkie.

⁷ Ami ngcuh këna Pita naw ngdüi law lü, “Benaë aw, khyangmjükcee naw, keia üngkhyüha thangkdaw ngja u lü, jumei khaiea ajana Pamhnam naw nangmi üngkhyüh ana mcawn tia nami ksingki.

⁸ Acunüng, mlung ksingkia Pamhnam naw mimi a jah peta mäiha, Ngmüimkhya Ngcim cun khyangmjükceea veia pi jah peki.

⁹ Mimi ja amimi, mi hngalangnak am ve, jumeikiea kyase ami mkhyekatnak jah mhlätki.

¹⁰ Acunakyase, mimi ja mi pupae naw pi am ami kpüieia phüi cun ivaia jumeikie am jah phüi hlusak u lü, Pamhnam nami mhnüteiki ni?

¹¹ Mimi cun pi amimia mäiha mi jum u lü, Bawi Jesuha bäkhäknak am küikyannak mi yahki” tia a pyen.

¹² Khyange cun Banabah ja Pawluh naw, Pamhnam naw jah summangei se, khyangmjükceea veia müncamnak ja cäicatnake ani bilawha mawng, ani jah mtheh üng käh khikhe u lü, ngaikie.

¹³ Cunüng ani pyen law päng ja Jakuk naw pi pyen hnga lü, “Benaë aw, ka pyen na ngai ua,

14 Pamhnam naw akcüka khyangmjükcee üngka, avange a phäha jah xü lü amimi jah bükteng khaia a lawa mawng cun, Sihmon naw ana pyen pänga kyaki.

15 Acuna ngthu cun sahmaea ngthu am tängki.

16 Cangcim üng: 'Acun käna nghlat be lü, Davita khaw ka pyang be khai, apyehnak naküt pi ka mdüi be khai;

17 Khyang akcee ja khyangmjükcee, ka ngming am ka jah khüe naküt pi ka veia law khaie.

18 Khawmdeka ngtüi üng tün lü, hina ngthu jah mthehia Bawipa naw ti ve' tia pyenki.

19 Acunakyase, khyangmjükcee üng, Pamhnama veia nghlat lawki he cun käh jah khuimkha u lü,

20 juktuh üng pet, käh ngcimki eiawk, hüipawmnak, khisa käh sawi u lü hnim ja thi käh ami ei vaia, ami veia ca jah kbi üng daw khai tia ngai veng.

21 Mosia thum cun sinakoka sabbath naküt üng khe khawia kya lü, mlüh naküt üng acuna ngthu cun sang päng kyaki" a ti.

Jumeiki khyangmjükceea veia ca ami ja kbi

22 Ngsäe, angvaie ja sangcime naküt naw, mimi üngka khyang xü u lü, Pawluh ja Banabaha veia Antioka tüih üng daw khai ami ti; ami jah xüe cun ami jah leisawnga kyaki. Ami ngming cun, Judah ami ti Barsaba ja, Tilah a kyaki. Acun xawi cun jumeikie üng angvai xawia kyaki.

²³ Hikba ani xawi üng ca ami ja kbi cun, “Ngsäe ja benae üng sangcim ngvaie naw, Antiok, Siria khaw ja, Kilikih khawa vekiea khyangmjükcee, ning jah hnukset ve u.

²⁴ Khyang avange naw, keimi naw am kami jah mtheha, keimi üngka naw law u lü, ‘Nangmi, nami vun nami mawi vai, thum nami läk vai’ tia, nami mlung ning jah bawngbaisakie tia ngja u lü,

²⁵ mi Bawi Jesuha ngminga phäha Banabah ja Pawluh cun naw xünnak am mcehnaki xawi,

²⁶ kami ja mhlänaka Banabah ja Pawluh, Bawipa Jesuh Khritawa phäh ami sak käh mceh naki xawi, atänga ja xü u lü, nami veia kami jah tüih law vaia kami jah tak,

²⁷ ahina mawngma ning jah mtheh law khai xawia, Judah ja Tilah cun nami veia kami ja tüih law.

²⁸ Ngmüimkhya Ngcim ja keimi naw atänga, yühkia phüi cun nami khana mtai üng am daw khaia ngai ve üng,

²⁹ juktuh peta eiawk, khisaa thi, kbüh lü hnima sa käh jah ei u lü hüipawmnak jah cehta ua; ahina ngkhaw nami jah cehtak üng ta nami phäha daw khai ni. Mya u lü ve u” tia ami yuk.

³⁰ Acukba ami jah tüih cun cit ni lü, Antiok phaki xawi; acunüng, khyange jah khü ni lü, ca cun ani jah pet.

³¹ Ami khe law päng ja, ami ja mcäinaka ngthua phäha aktäa jekie.

³² Judah ja Tilah cun sahmaa pi kyaki xawia kya lü, ngthu khawha am, benae jah mcäi ni lü, khawvei ktha ani jah pet.

³³ Acua khawvei ani ve këna, jah tüih lawki hea veia nghlat be khai xawia, benae naw dim'yenak am ami jah tüih be.

³⁴ Acunsepi, Tilah cun amät ve hütki.

³⁵ Pawluh ja Banabah cun Antiok khyang khawhah am ve yüm lü, Bawipa ngthu jah mtheimthang ni lü atänga veki xawi.

Pawluh ja Banabah ngtaiki xawi

³⁶ Khawveica angawk law këna, Pawluh naw Banabaha veia, "Tuhkbäih ni cit be lü, Bawipa ngthu ni sangnaka khaw naküta bena vekie veia cit hü lü ami vecawh ni jah bükteng hü vai" a ti.

³⁷ Banabah naw, Johan Makuh ami ti cun ani veia cehpüi vaia a täng,

³⁸ Pampulih khaw üngka naw ja hawih hüt lü, khüibi bi khaia ani hlawnga am cit hngakia kyase, Pawluh naw ta Makuh ani hlawng cehpüi vaia am jum.

³⁹ Acunakyase, aktäa ngcuhi xawi, ngtai law ni lü, Banabah naw Makuh cun a hlawnga cehpüi lü, Kuparuha mlawng am citki xawi.

⁴⁰ Pawluh naw Tilah a xü; acunüng, jumeikie naw Bawipa bähäknak ami mcei vai ja ngthu ami jah pet.

⁴¹ Sangcime jah khäng hüsak lü Siria ja Kilikih khaw avan üng cit hüki.

16

Pawluh ja Tilah hlawnga Timoti citki

¹ Pawluh ja Tilah cun Derbe ja Luhtarrah citki xawi; acua Timoti ngming naki khritjan mat

veki; ani cun jumeikia Judah nghnumia cakpaa kyaki, a pa cun Krika kyaki;

² Ani cun Luhtarah ja Ikonihä vekie naw jumeiki ti lü ania mawng cun pyenkie.

³ Pawluh naw ani cun ami hlawnga ami cehpüi vai a täng. Acunüng, acua vekiea Judahea phäha, a vun a mawihsak, a pa Krika kyaki tia ami van naw ami ksinga phäha kyaki.

⁴ Mlüh naküt üng cit hü ni lü, Jerusalema angvaie ja ngsä he naw ami mkhyaha jah läklam vaie cun jumeikie üng ani jah mtheh.

⁵ Sangcime cun jumnak üng khäng u lü a mhnüp tä se nung law dämdämkie.

Tarosa Pawluh naw ngdamnak a hmu

⁶ Ngmüimkhya Ngcim naw Asah hne ngthu sang vai am ti se, Pharikih hne ja Kalatih hne avan üng cit hüki xawi.

⁷ Mutih ng'yü pei ani pha law ja, Bithunih hnea lut khai xawia büki xawi, acunsepi, Jesuha Ngmüimkhya naw am a jah cehsak.

⁸ Mutih khe ni lü, Taros da* citki xawi.

⁹ Mthana Pawluh naw mdannak üng Maketawniha khawa ka khyang mat ngdüi lü, "Maketawniha khawa law lü, jah kpüi lawa" tia, nghui na se a hmuh.

¹⁰ Acuna mdannak a hmuh law päng ja, ami veia thangkdaw pyen khaia Pamhnam naw jah khüki tia ksing ni lü, Maketawniha hnea ceh vaia kami ngtünki.

Philipiha Lidia naw küikyanak a yaha mawng

* **16:8** Kdungkie; am ani üngkhe lü.

¹¹ Taros üngkhyüh mlawng am cit u lü, Samotarar kami citki, angawi üng Nepoliha kami cit be tüki;

¹² Acun üngka naw Philipih mlüha kami citki, acuna mlüh cun Maketawniha† khaw üng mlüh mata kya lü, Romah mlüh ktung üngkaa kyaki. Acuna khaw üng khawvei kami vekki.

¹³ Sabbath mhnüp üng, khaw kpunga cit u lü, tui caye da, Judahea ktaiyünaka hnüna vekia kami ngaih. Acua ngaw lü, ngbäm lawki hea nghnumie veia ngthu kami pyenki.

¹⁴ Acunüng, Lidia ngming naki, jihsen jawiki, Tuhtirah khawa ka, Pamhnam jumkia nghnumi mat naw kami ngthu ngja lü, Pawluha ngthu pyen cun aktäa ngai khaia Bawipa naw a mlung a mhmawng.

¹⁵ A im khyawng avan naw Baptican ami khan law päng üng, “Bawipa jumei kcangkia nami na ngaih üng ka ima kai law ua” tia, jah nghui na lü a jah mtheh.

Philipiha Thawngim üng ami jah khyum

¹⁶ Mhnüp at üng ktaiyünaka hnüna kami ceh k'um üng, mpya nghnumica mat malam pyen lü ngjoki kami khyum. Acuna nghnumica cun Ngmüimkhya kse naw a mahpa phäh malam pyen lü ngui khawh yahki.

¹⁷ Acun naw Pawluh ja keimi jah läk law lü, “Hina küikyannaka lam ning ja mtheh lawki he cän hlüngsäihki Pamhnama mpyae ni” ti lü, ngpyangki.

† **16:12** Maketawniha mlüh ktung,cangcim avang
 üngtaMaketawih üng mlüh kyäp bawkam ani
 üngMaketawniha mlüh daw

¹⁸ Acukba khaw mhnüp khawvei veki. Acukba kyase Pawluh naw am ngja law hlü lü, nghlat sihki naw, Ngmüimkhya kse üng, “Jesuh Khritawa ngming am ka ning mthehki, a k’um üngka naw lut law” a ti ja lut lawki.

¹⁹ Acunüng, a mahpae naw, ami ngui suinak päihki tia ksing law u lü, Pawluh ja Tilah jah man u lü, khyang ngkhämna, angvaiea veia ami jah cepüi.

²⁰ Romah Bawiea veia ja cepüi u lü, “Hi xawi hin Judah khyang xawia kyaki xawi, kami mlüh jah khuimkha lawki xawi,

²¹ Ami naw mi thum kpetki thumcam jah mtheikie. Mimi cun Romah khyanga mi kyaki. Amimia bilawh cun am mi läk dat vaia thum pyeni xawi” ami ti.

²² Acunüng khyange cun Pawluh ja Tilah jah pawh khaiea ngkhäm law hngakie, bawie naw ani kcu ja suisak u lü, cung am jah kpai vaia ngthu ami jah pet.

²³ Khawvei ami jah kpai päng lü, thawngima ja khyumkie naw, thawng ngvai naw ngängki am, üp ye khaia a ngäng vaia ami jah mtheh.

²⁴ Acukba mtheh u se, thawngim ngvai naw, thawngima ak’um säisäiha ja khyumki naw, ani khaw cun khyaw üng a jah khun.

²⁵ Acunsepi, Pawluh ja Tilah cun, mthana Pamhnama veia ktaiyü ni lü, ng’äi mcuk ni se, thawngim üng kyum hngakie naw ami jah ngaih.

²⁶ Angxita ngkhyü ngsün law se, thawngima hnün pi ngsün lawki; acunüng, ksawh naküt nghmawng law se, khyange ami jah khihnake cun ngsutei law päihkie.

27 Thawng ngvai cun a ihnak üngkhyüh tho lawki, thawngim ksawhe nghmawng u se jah hmu lü, thawng kyume dawng päikiea ngai lü, a kcim lo lü hnimei khaia ngtängki.

28 Acunsepi, Pawluh naw, ngpyang lü, “Käh thawna; kami van hia kami veki ni” a ti.

29 Thawng ngvai naw meikdäi akjanga jah kthäh lü, kyühei lü ngkhyet lü, Pawluh ja Tilaha hmaia kawpki.

30 Kpunga jah cehpüi lü, “Saja xawi aw, küikyannak ka yah vaia i ka pawh khai?” a ti.

31 Ani xawi naw, “Bawipa Jesuh jumeia, acunüng, namät ja na khuiim khyawng lawnge maha küikyannak nami yah khai” ani ti.

32 Acunüng, a veia ja, a ima veki naküta veia Bawipaa ngthu ani pyen.

33 Acuna mthan, acun naji üng jah cehpüi lü, ami jah kpainaka ani nghmae cun a jah mthih pet; acunüng, amät ja a khuiim khyawng lawng ami ngkhä Baptican khankie.

34 A ima ja cehpüiki naw, jah khin na lü, Pamhnam ami jumei lawa phäha, amät cun a khuiim khyawng lawng ami van am aktäa jekie.

35 Khaw a thaih law ja, Romah bawie naw, “Acun xawi jah khyah ua” tia, jee ami jah tüih.

36 Acunüng, thawng ngvai naw, Pawluha veia, “Bawie naw, ning ja hlät khaiea, khyang jah tüi lawki he ni; acunakyase, atuh lut law ni lü, dim'yenak am cit nia” a ti.

37 Acunsepi, Pawluh naw, “Romah khyanga kami kyaki, kami mkhyenak am ve xaki ami jah kpai u, thawngim üng ami jah khyum; atuh anghmüa jah ktäm khaiea bükie aw? Acukba am

kya sawxat khai; amimät Romah ngvaie law u lü, jah hlät law u se” tia, je ngvai ani jah mtheh.

³⁸ Je ngvai naw, acuna ngthu cun Romah ngvaie ami jah mtheh; acunüng, Romah khyanga kyaki xawi tia jah ksing law u lü, kyühei lawki he naw;

³⁹ va cit u lü, ja mcäikie naw, jah nghui na be u lü, thawng üngka naw jah hlät u lü mlüh cun ani cehtak vaia ami jah mtheh.

⁴⁰ Acunüng, thawngim üngka naw lut law ni lü, Lidia ima citki xawi; jumeikie jah hmu ni lü, jah dim’yesak ni lü, cit beki xawi.

17

Thesalonikah mlüha citki xawi

¹ Pawluh ja Tilah cun Amphipolih ja Apolonih jah khe pah lü, Thesalonikah mlüha Judahea sinakoka venaka citki xawi.

² Acua Pawluh cun a thum khawia mäiha, ami veia lut lü, Sabbath mhnüp kthum vei, khyange mahmah ngthäh ngkhyah u lü pyen u lü, Cangcim üngka jah mtheh lü,

³ Mesijah naw khuikhanak khamei khaia akyaka mawng, thinak üngkhyüh a tho be vaia mawng cun jah mthehki. “Hina Jesuh ka ning jah mtheh cun Mesijaha kyaki ni” ti lü Pawluh naw a jah mtheh.

⁴ Avang he naw jum u lü, Krik khyang khawhae ja nghnumi khawhae naw Pawluh ja Tilaha veia law u lü Mhnam mküimto lawki he.

⁵ Acunsepi, Judahe naw, k’eihei u lü, lama i käh pawhkie cun jah lawpüi u lü khyange jah ngcun lawsakie naw, mlüh avan üng suksak lawki he.

Acunüng, Jasona ima ngkhäm law u lü, Pawluh ja Tilah cun khyangea hmaia ami jah chepüi vaia ami täng.

⁶ Am jah hmu u lü, Jason ja jumeikie cun khyang ngvaiea hmaia jah kaihkie naw, ngpyang u lü, "Hina khyange naw avan suksak khaia Khawmdek nglatsakie cun mi mlüha lawki he;

⁷ Jason naw jah na khin na ve, ahin xawi cun, 'Jesuh ngming naki, sangpuxang kce vekie tia, Emperoa thum am läk ni" ami ti.

⁸ Acuna khyange naw mlüh ngvaie cun ami jah suksakei;

⁹ Jason ja a püie cun ngui jah tä lü jah hlät lü ami jah chepsak be.

Berih mlüha phaki xawi

¹⁰ Jumeikie naw mthana, Pawluh ja Tilah cun Beriha jah chepsak u se; acua ami va pha ja, Judahea sinakoka lutki xawi.

¹¹ Acuna khaw khyange cun, Thesalonikah mlüh khyangea kthaka ana daw u se, mlung jenak am ngthu cun dokhameikie, ani ngthu pyen cun am akcang ja akcang ksingnak vaia, a mhnüp tä se, Cangcim cun büktengkie.

¹² Acunakyase, khyang khawha naw jum u se; Krik nghnumi kdawe ja kpmie naw pi jum lawki he.

¹³ Acunsepi, Thesalonikah mlüha ka Judahe naw, Pawluh naw Berih mlüha pi Pamhnama ngthu sangki tia ami ksing üng, acua pi va cit u lü, khyange ami jah va ksük.

14 Jumeikie naw, Pawluh cun tui cayea cit khaia ami tüih. Acunsepi, Tilah ja Timoti cun acua ve hütki xawi.

15 Pawluh va thakie naw, Aten mlüh cäpa cit u lü Berih da nglat law be lü Pawluh naw a jah cüka kba, Tilah ja Timoti cun naw akjanga a jah mtheh.

Aten mlüha

16 Pawluh naw Atena Tilah ja Timoti jah k'äih lü a ve üng, mlüh cun juktuhe am be lü a hmuha kyase, aktäa a mlung am daw.

17 Acunüng, sinakoka Judahe ja Pamhnam junkie khyangmjükcee jah pyenpüi lü, khyang ami ngkhämnaka law nakütkia veia a mhnüp tä se a jah pyenpüi.

18 Epikurih ja, Stok sajae naw ani ngcuhpüikie. Avang he naw, “Hin ia am ngtäh xaki naw i pyen hlüki ni?” ami ti. Avang he naw, Jesuha mawng ja thawhnak bea mawng a pyena phäha, “Pe kcea ka mhnama mawng pyenki am ni aw” ami ti.*

19 Pawluh cun man u lü, mlüh kawngci, Arepakaha hmaia lawpüi u lü, “Hina mtheimthangnak akthai na pyen hü hin na jah ksingsak thei khai aw?”

20 Akthai am kami ngjak khawi cun na sang lawki ni; acunakyase, acuna suilam kami ksing vai täng ve üng” ami ti.

* **17:18** Jesuh ja thawhnak be: Krik üng “thawhnak be” hin naw mhnam nghnumia ngminga kyaki tia ksing phyaki.

21 (Aten mlüha khyange ja khine cun, ngthu kthaia akyak üng, ami pyen vai ja ami ngaih vaia phäha ami kcün sumeiki he.)

22 Pawluh cun kawngci hmaia ngdüi lü, “Nangmi Aten khyange cun, a naküt üng jumnak aktäa nami taki ti ka ksingki.

23 Ka ceh hü sawa, nami hjawkhahe ka ja bükteng üng, kpyawngkung mata khana, ‘Am ksinga Mhnama phäha’ ti lü ng’yuki ka hmuh. Acunakyase, am ksing u lü nami jumei, acuna mawng ka ning jah mthehki ni.

24 Pamhnam, khawmdek ja a k'uma veki naküt ja mhnünki cun, mce ja khana Bawia kyase kut am saka temple üng am ve.

25 Khut bi lü a hlüei cun mi pe khai aw, amät kung cun anaküt am xünnak, ngxünak a naküt üng pekia kyaki.

26 Acunüng, khawmdek khan naküt üng ve khaia, khyang mat üngka naw khyang mjüe naküt atäng tänga jah mhnün lü, ami phäha akcün ja ami venak vai phäh phähe pi a jah tak pet.

27 Acunakyase, Pamhnam cun ami hmuh vaia sui hükie; acunsepi, Pamhnam cun mimi üngkhyüh akthuka am ve.

28 Amäta phäha mi xüng lü, mi thoawm lü mi veki; ‘Keimi pi Mhnama a jah caea kami kyaki’ tia nangmi üng khyang mat naw pyenki.

29 Acukba Pamhnama caea mi kya ua phäha, nghngicima khyaihnak am pyanga xüie, nguie,

lung he lup cun Mhnam am tänga käh jah ngaih vai.

³⁰ Ahlana Pamhnam am ksing u se, jah na hawih khawi se pi, atuh cun ahawa pi ami mkhyekatnak nghlatak vaia ngthu a jah petki,

³¹ akcün a na pyang päng thüp thüpa phäha, acuna mhnüp üng, a mcawna nghngicim phäh khawmdek avan cun angsunga ngthumkhyah law pe khai; acun cun Pamhnam naw thihnak üngka naw mtho be lü, khyange naküta veia angsingsak pänga kyaki” tia a pyen.

³² Acuna thihnak üngka naw mthawh bea ngthu Pawluh naw pyen se ami ngjak üng avange naw ami yaihei; avange naw, “Hina ngthu na pyen be vai ngja hlü ve üng” ami ti.

³³ Acunüng Pawluh naw ami ngkhyumnak a jah cehtak.

³⁴ Acunsepi, khyang avange Pawluha veia ngdawn law u lü, jumei lawki he; acunüng avange cun, Dajonutih khyang kawngci üngkaa kya u lü avange cun nghnumi mat Damarih jah khyang kcea kyakie.

18

Korintuh mlüha

¹ Acunüng Pawluh cun Aten mlüh üngka naw Korintuha citki.

² Acuia Akuilah ngming naki Judah khyang mat a hmuh, acun cun Pontasa hmikia kyaki. Sangpuxang Kalawdih naw Judahe naküt Romah hne üngka naw ami ceh vaia jah ktäm se, a khyu Priscilah am Itali üngka naw law thaiki xawia kyaki. Pawluh naw jah hmu khai citki.

³ Pawluh cun, acu xawia veia phaki, acunüng, ami bi tängkia kyase, ani veia ve lü, ani veia khüikawm hngaki; ami bi cun jih im saka kyaki.

⁴ Sabbath naküt üng sinakoka yet na kchang lü ngthu pyen khawi lü, Judahe ja Krike jah yah khaia büki.

⁵ Tilah ja Timoti cun Maketawniha üngka naw pha law ni lü, Pawluh cun a kcün naküt üng Judahe veia Jesuh cun Mesijah ni ti lü ngthu jah mthehki.

⁶ Acunsepi Judahe naw ma u lü ksenakiea kyase, Pawluh naw a suijih üngka mput kha lü ami veia, “Nami khyüh üng namimäta phäh ni, kei naw am mta na veng. Tuhkbäih khyang-mjökceea veia ka cit khai” a ti.

⁷ Acun üngka naw citki cun, Tihtuh Jastas ngming nakia ima phaki, acun cun Pamhnam jumki, a im pi sinakoka peia kyaki.

⁸ Acunüng, Kripuh, sinakoka ngvai naw, a khuiim khyawng lawng ami van naw Bawipa jumei law u se, Korintuh khyang khawhae naw pi ngja u lü jumei law hnga u lü, Baptican khankie.

⁹ Mthana Bawipa naw mdannak üng, Pawluha veia, “Käh kyühei lü, ngthu na pyen cän käh hjaüha;

¹⁰ kei na hlawnga ka veki ni, ning hui khaia u naw am ning pawh; hina mlüh üng, ka khyang khawha ka taki ni” a ti.

¹¹ Pawluh cun, acua ami veia Pamhnama ngthu jah mthei lü, kum mät ja khya khyuk veki.

¹² Acunüng, Kalio, Akaijah mlüha sangpuxang Romah naw a mcawn üng, Judahe naw atänga Pawluh man u lü, junga chepüikie.

¹³ “Hin khyang naw, käh nglawi khaia Mhnam jum vaia khyang ksük lü thum lümkankei” ami ti.

¹⁴ Pawluh naw a pyen law hlü üng, Kalio naw Judahea veia, “Judahe aw, hin hin am dawki ja mkhyekatnak a pawh a nia ta, acinglinga ka ning jah ngaih pet vai sü;

¹⁵ acunsepi, ngthu nami ngcuh, ngming he ja nami thumea ngkhawa kya üng ta, namimät naw pyensa ua; kei acuna ngkhaw ka cijang vai am täng veng” a ti.

¹⁶ Acunüng, jung üngka naw, ami van a jah ksät.

¹⁷ Krike naw, sinakok ngvai Soten mankie naw, junga maa kpai u se, Kalio naw acun cun ia pi am ngai.

Antiok mlüha nghlat bekie

¹⁸ Acun käna Pawluh cun khawvei ve lü; acun käna Korintuha jumeikie cun thangkdaw am jah ngtaipüi lü, acun üngka naw Siria da mlawng am citki, a veia Priscilah ja Akuilah cit hngaki xawi; Pawluh naw ajana sitih ana taka mäiha Kenkirih mlüha a lusam kteih petki.*

¹⁹ Ephet mlüha pha u se, acua anini cun jah hawih hüt lü, amät sinakoka k'uma lut lü, Judahea jah ngthähngkhyah püiki.

²⁰ Khawvei ve khaia ami nghuinak, acunsepi am yü.

18:18 Num 6:18 * **18:18** Ng'yünnak ani naw a pawh: Ahin cun Judahea thum üng lu kteih lü ng'yünnak cun läk yahkie.

21 “Pamhnam naw a hlüeia akyak üng nami veia ka law be khai ni” tia, thangkdaw am jah ngtaipüi lü, Ephet üngka naw mlawng am citki.

22 Ketarih a pha üng, Jerusalema jäng cit lü, sangcime cun a jah hnukset; acun këna Antiok mlüha cit beki.

23 Acua khawvei a ve këna cit be lü, jumeikie ngjuktha jah pe lü, Kalatih hne ja Pharikih hne avan üng cit hüki.

Apawluh Ephet mlüh ja Korintuh mlüha citki

24 Judah khyang mat, Aleksandria mlüha hmiki, Apawluh ngming naki, Ephet mlüha lawki; ani cun pyesak yah lü Cangcim aktäa ksingkia kyaki.

25 Ani cun Bawipa Mawnglam ngthei pängkia kya se, yet na kchang lü, Jesuha mawng kchang aktäa xena lü jah mtheimthangi, acun se pi Johana Baptican däk va ksingkia kyaki.

26 Acunüng, sinakoka lingnak kchang am ngthu pyen law se, acua Priscilah ja Akuilah naw a ngthu pyen ngja ni lü, ani ima khüki xawi naw, a veia Pamhnama Mawnglam cun ngsing ngai khaia ani mtheh.

27 Apawluh cun, Akaijah khawa cit khaia ngtängse, Epheta veki jumeikie naw ami na dokhamnäk vaia, jumeikie naw ca yu u lü ami cehsak. Acunüng, a va pha üng Pamhnama bähäknaäk am jumeikie cun aktäa jah kpüikpaki.

28 Jesuh cun Mesijaha kyaki tia mawng cun Judahe jah ngcuhngkaih püi lü Cangcim üngka jah mdang lü khyange aktäa a jah näng.

19

Pawluh Ephet mlüha

¹ Apawluh Korintuh mlüha a ve k'um üng, Pawluh cun pe k'uma ceh hü päng üng Epheta pha law lü, axüisawe avang a jah hmuh.

² Ami veia, "Nami jumei law üng Ngmüimkhya Ngcim nami yahki aw?" a ti. Acunüng, amimi naw, "Ka; Ngmüimkhya Ngcim veki tia pi am ngja khawi u ngü" ami ti.

³ Ani naw, "Ia Baptican ja nami khan?" a ti. Amimi naw, "Johana Baptican" ami ti.

⁴ Pawluh naw, "Johana Baptican cun ami mkhye nglatakia phäh kyaki, 'Johan naw Isarel khyange üng, 'Ka hnuu law khai cun nami jum vai, "Ani cun Jesuh ni" ti lü a jah mtheh.

⁵ Acuna ngthu ami ngjak ja, Bawipa Jesuha ngming üng Baptican khankie.

⁶ Pawluh naw, ami khana a kut mtai se, Ngmüimkhya Ngcim ami khana pha lawki; acunüng, läk akce am ngthu pyen u lü, Mhnama mawng sangkie.

⁷ Ami vana kpami xaleinghngih lawki he.

⁸ Pawluh cun sinakoka k'uma lut lü, khya kthum üng yet lü ngthu pyenki, Pamhnama pea mawng cun khyange jah ngcuhpüi lü jah ksingsaki.

⁹ Acunsepi, avange cun ami mlung ngcang se, am jum u lü khyangea hmaia Bawipaa Mawnglam ami ksekhanak. Pawluh naw jah cehta lü, jumeikie akcea jah cehpüiki naw,

amhnüp* tä se Turanah ima jah ngthähpüi lü jah mtheimthangki.

¹⁰ Acukba kum nghngih jah mthei se, Asah hnea vekie naküt Judahe ja Krike naw pi Bawipa ngthu cun ngjakie.

Sakevaha cakpae

¹¹ Pamhnam naw Pawluh üngkhyüh müncam phyaki jah pawhki.

¹² Acunüng, Pawluha pava ja a jih cum am khyaihki vei ami cehpüi, mnehmnange cun khyük u lü khawyaie pi ngsätkie.

¹³ Khawyai ksät hükie Judah avange naw, “Pawluh naw a pyen hü khawia Jesuha ngming am ning jah ksät ve üng” ti u lü, khawyaia venaka khyangea khana, Bawipa Jesuha ngming sumeiki he.

¹⁴ Judah khyang, ktaiyü ngvai säih mat, Sakevaha cakpa khyühe naw acukba pawh hlüki.

¹⁵ Acuna khawyai naw ami veia, “Jesuh ka ksingki, Pawluh pi ka ksingki, nangmi hin ue ni?” ti lü a jah kthäh.

¹⁶ Khawyaia venak naw, jah jawng law sih lü, ami van jah nängei se, acuna im üngkhyüh, lemkie kyase, ami suisak hawih hüt lü dawngkie.

¹⁷ Epheta vekia Judahe ja Krikea veia, acuna ngthu cun ngthang hüki; acunüng, avan kyüh hü u se, Bawipa Jesuha ngming mhlünmtai lü vekie.

¹⁸ Jumeikie khawhah law hü u lü, ami bilawhe cun khyang ksunga jah phyeh lawki he.

* **19:9** cangcim avang üng ngpüiki11:00 ngawilam üngkhyüh 4:00 mülam căpa.

19 Ngjo khawhae naw pi, ami caupe jah lawpüi u lü, khyang ksunga ami jah mkhieh law; acun üng, a phu täh u se, ngui thawng mhmakip phunakia ami ksing.†

20 Ahikba johit am be lü, Bawipaa‡ ngthu cun ngthang hü lü däm law bawk bawki.

Ephet mlüha suksaknak

21 Acun käna Pawluh cun, Maketawniha ja Akaijah üng kdung hü lü, Jerusalema cit khaia ngtängki, § “Acua ka ceh käna Romah pi ka hmu khai” a ti.

22 Khüipüiki xawi nghngih, Timoti ja Eratuh cun Maketawniha hnea jah cehsak lü, amät cun Asah hnea ve hüki.

23 Acuna kcün üng Epheta Bawipaa Mawnglama phäh aktäa khuikhanak vek.

24 Dematarih ngming naki, nguiksep naw Artimih mhnam nghnumicaa alup sep se, a khyange naw khawhthem khawhah yah nakie.

25 Ani naw, ami bi tängkia nguiksepe jah ngcunpüi lü, “Ka püie aw, hina khawhthem cun hin mi bilawhna üng lawki tia mi ksingki,

26 Tuha Pawluh naw, ‘Khyanga kut am pyang naküt cun mhnama am kya ve’ ti lü, hina Epheta däka am kya, Asah hne naküt üng pi khyang khawha jah ksük se, hmu u lü nami ksingki.

27 “Acunakyase, mi bi, ngui mi yahnak ami jah hmumsit law däk vaia am ni lü mi thang

† 19:19 Ngui kawin: ngui kawin cun ngnama vekiea ami hlawhei kheha kyaki (Bük Mt 20.2) ‡ 19:20 Hina ... Bawipa; am ani üngBawipa johita mawng. § 19:21 Pawluh naw a mlunga mkhyah; am ani üngPawluh cun Ngmüimkhya naw a mkhyahsak.

pi se khai ni, hlüngtaikia Artimih mhnam ngh-numicaa Temple pi hmumsit law u se, Asah hne üng khyange naküt, khawmdeka khana khyange naw ami jum khawi hin, ia am mawng law khai ni tia pi kyühei phyä ve” a ti.

²⁸ Acuna ngthu ami ngjak üng ami mlung so law se, “Ephet mlüha ka Artimih hin hlüngtai kchangki ni” tia, ngpyangkie.

²⁹ Mlüh avan üng acun ngthang hüki. Kajas ja Aristakhas, Maketawnih khyang xawi Pawluh naw a jah ngkhahpüi cun jah mankie naw, pawl binak ima ami jah cepüi.

³⁰ Pawluh cun khyangea maa cit khaia bü se, jumeikie naw ami mkhyawh.

³¹ Acunüng, acuna hne üngka ngvaie, Pawluha püie naw, a veia khyang tüih u lü, pawl binak ima käh cit khai ami nghuinak.

³² Ngbäm lawki he khawhah naw ami ngbäm lawa suilam pi am ksing u, acunakyase, avang ngthu mat pyen lü ngpyang u se, avang ngthu akce am ngpyangkie.

³³ Acunüng, khyang avange naw Aleksanda cun üng mta vekü ni ami ti, isetiakyaküng, Judahe naw ani cun maa ami chehsak ni ami ti. Acunüng, Aleksanda naw a kut khyange veia käh khikheh khaiea säng lü, amät sungkhamei khaia ngbüki.

³⁴ Acunsepi, ani cun Judah khyanga kyaki ti ami ksing üng, naji nghngih hlawk atänga, “Epheta ka Artimih hin hlüngtaiki ni” tia aktäa ngpyangkie.

³⁵ Acunüng, mlüh kcak’yu naw khyange a jah dimsak lü, “Ephet khyange aw, Ephet mlüh

cun hlüngtaikia Artimih Temple ngängki ja khankhawa khyüh lung ngcim kya lawki ni a ti.

³⁶ Acunakyase, u am ngtek khawh u ki. Nami dim vai, amdanga i käh nami pawh vai.

³⁷ Hin üng nami jah lawpüi xawi hin, Temple phyehkiea am kya ni, nami mhnam pi am ksekha na ni.

³⁸ Acunakyase, Dematarih ja a püi nguiksepe naw, nami ngcuh vai am vea kya üng kami ngvaie vekie, junga pi mi cit khaie ami ti.

³⁹ Akce mtai vai nami tak üng pi, kchang mkhyah vai mlüha vekie khyange am mi ngkhyum khaie ami ti.

⁴⁰ Tungawi thawnhlawkia phäha mi kyühkyawk vai suksaknak vaia vekie. Isetiakyaküng hina am kchangkia ngbämnak cun ami jah msuhei ta ihawkba pi am mi pyen thei khai ni.

⁴¹ Acun a pyen päng ja ngbäme a jah tüih be.

20

Maketawnih ja Akhacia citkie

¹ Suksaknak a ngdüm law käna, Pawluh naw jumeikie atänga jah khü lü ngjuktha jah pe lü a jah ngtaipüi. Ani cun jah cehta lü Maketawniha citki.

² A ceh sawa acuna hne cu khyang khawhah ngjuktha jah peki. Acun käna Akhacia cit lü,

³ acua khya kthum vekie. Ani cun Siriaa cit khai ngtängki lüpi Judahe naw ami pawh vaia ceng u se, Maketawniha da nglat khaia ngtünki.

⁴ Puruha cakpa Sapotah Beriha ka, Aristakhas ja Sekudah Thesalonikaha ka xawi, Kajas cun

Derbea ka, Timoti, Taikikah ja Throphimah Asaha ka xawi, acune cun ani üng atänga veia cit hngakie.

⁵ Acunee cun ana cit ma u lü, Tarosa keimi jah na k'äihkie.

⁶ Keimi cun hngen am kcaw muk pawl käna, Philipih üngka naw mlawng am cit u lü, amhnüp mhma üng Taros kami phaki; acua mhnüp khyüh kami vekie.

Tarosa Pawluh citki

⁷ Acunüng, mhnüp khyühnak* mümlama bu ei yüm vaia kami ngcunki. Acunüng Pawluh cun a ngawi üng cit khaia bükia kyase, ami veia ngthu pyenki naw, mthan nglung căpa a pyen.

⁸ Kami ngcunnak khan ima meim khawhah ami jah mdäi.

⁹ Etukhuh ngming naki cawngpyang mat mkawt peia ngaw lü, a mik ku se ngam lü vekie. Acunüng, Pawluha ngthu pyen thuk law se, ip tawng lü im athat kthumnak üngka naw mcea kya se akthia ami law be.

¹⁰ Acunüng, Pawluh kyumki naw, a khana ngbawk lü kawiki naw, "Käh ng'ä ua, xüng ham ve" a ti.

¹¹ Pawluh kai be lü, muk bo lü eiki. Khaw athaih law lü nghngi a pyü law căpa ngthu pyen lü, acun käna citki.

¹² Acunüng, cawngpyang cun akxünga ima cehpüi be u se aktäa ami mlung dim'yeki.

Taros üngka naw Miletuh da

* **20:7** Mhnüp khyüh; am ani üngMhnüp kcük.

13 Keimi cun mlawng am law u lü, Asiha kami cit khaia mlawng am kami na cit maki, acunüng Pawluh cun kami ngcum lawpüi vaia kami täng kyaw; a khaw am law khaia ngtängki.

14 Asiha jah na ngkhyum püi lü, ani kpan law lü Mituliniha kami citki.

15 Acunüng ka naw, mlawng am cit u lü, a ngawi üng Kioh kami phaki. A ngawi üng, Samoh pha u lü, a ngawi be tü üng Miletuh kami phaki.

16 Pawluh cun Asaha khawvei a ve vai am täng lü, Ephet da cun mlawng am cit khaia bü kungkia kyaki, athawn theia kyak üng Jerusalema Pentikos mhnüp üng a pha vai ngsengeiki.

Ephet sangcim ngvaiea veia Pawluha ngtainak ngthu pyen

17 Acunüng, Miletuh khaw üngka naw, Epheta khyang tüih lü, sangcim ngvaie a jah hmuh vaia a ja khüsak.

18 Acunüng, a veia ami pha law üng, Pawluh naw, “Asah hne ka pha law üng tün lü, atuh cäpa ihawkba ka kcün ka sumeiki tia nami ksingki.

19 Mdihmsuinak ja ka kphyutui baw lü Bawipaa mpya akba khut ka biki. Isetiakyaküng Judahe naw na hnim khai ami büa phäh kyaki.

20 Nangmi am ka ning jah kuei vaia i pi am ka thupki tia nami ksingki ni, khyangea ksunga ja im naküt üng ka ning jah mthei khawiki.

21 Judahe ja khyangmjükceea veia pi Pamhnama veia nghlat law be u lü, mi Bawipa Jesuh ami jumei lawnak vaia ngthu ka pyen ni.

22 Acunüng, atuha Ngmüimkhya Ngcim kchang na lü Jerusalem da ka cit khai, acua kei ia na pawh khaie am ksingei veng.

23 Ka cehnak hü mlüh naküta thawng jah mkhuimkhanak naw na k'aihki tia Ngmüimkhya ngcim naw na mthehki ni.

24 Acunsepi, ka kcün sak hin ia am kya, isetiakyaküng thangkdaw tinaki Pamhnama bähäknak sang lü, Bawipa Jesuh naw a na peta khut ja mission cun ka mcän vai ni ka hlüei ta.

25 Acunüng, nangmi, Pamhnama pea mawng sang lü nami veia ka cit huki. Tuh ta nangmi naw am nami na hmu be ti khai tia ka ksingki.

26 Acunakyase, nami khyüha kyak üng keia mtaa am kya ve tia tungawi angtea ning jah mtheh veng.

27 Pamhnama a ngjak'hlü naküt avan, nami veia am pyen hlü lü ka mji i am ve.

28 Acunakyase, nami mät ja namimät mcei ua, Pamhnam[†] naw a cakpa[‡] thisen am a khyäiha sangcim nami mcah khaia Ngmüimkhya Ngcim naw aning jah mceisaka tome cän pi jah mcei ua.

29 Ka ceh käna mhnge kyung he nami ksunga law u lü, ami naw tomee käh jah mpyenei khaie tia ka ksingki.

30 Namimät üngka khyang avange law u lü jumeikie jah mhlei lü ami jah läk vaia thawn law khaie.

20:24 2Tim 4:7 † 20:28 Pamhnam; cangcim avang üngtaBawipa. ‡ 20:28 A Cakpaa thi üngkhyüh; am ani ünga Cakpa thihnak üngkhyüh; amäta thi üngkhyüh.

³¹ Acunakyase, mcei ua; kum kthum ka kphyu-tui baw lü, amhnüp amthan ka ning jah mthei cän süm ua.

³² Tuhkbäih Pamhnama bähäkna ngthu üng ka ning jah taki, acun naw ning jah sawngsa lü, ani naw Pamhnama dawkyanak a khyangea phäh a tak cun ning jah pe khai.

³³ Ua xüi, ngui, suisak pi am hlüei khawi veng.

³⁴ Kamät ja ka püiea hlükaw cun kamät bilo lü kami eiawki ti cun namimät naw nami ksingki.

³⁵ Acukba nangmi pi khüi u lü, Bawipa Jesuha ngthu nami sümna am, ktha ngcekie nami jah kpüi vaia, anaküt ka binak am ka ning jah mdanki; amät Jesuh naw, ‘Yahnaka kthaka petmsawtnak üng jekyainak bawk ni’ ti lü a pyen.

³⁶ Acunüng, acukba ngthu a pyen law päng üng, ami mkhuk jah sümpüi lü ktaiyükie.

³⁷ Ami van kyap u lü, Pawluh cun kawi u lü aktäa mhnamkie.

³⁸ Ani am ami hmuh be ti vaia cun a pyena kyase ami mlung thüikiea kyaki. Acunüng, mlawnga venak cäpa cit u lü ami tha.

21

Pawluh Jerusalema citki

¹ Amimi am kami ngtai këna, mlawng am cit u lü Kotah kami pha lawki. Acunüng, angawi üng Rodih pha u lü, acun üngka naw cit u lü, Patarah kami phaki.

² Phonisia cit khaia mlawng mat hmu u ngüse, acun ngcum u lü kami citki.

³ Kuparuh hmunaka cit u lü, cumlama cit u lü Siria kami phaki. Acunüng Turah tui pei kami phaki. Acua mlawng üngka phüihe jah lawh vaia kyase.

⁴ Acunüng, jumeikie jah hmu u lü, acua mhnüp khyüh kami veki; acunüng, anini naw Pawluh cun Ngmüimkhya am mtheh u lü, Jerusalema käh a ceh vaia ami mtheh.

⁵ Acunsepi, acuna mhnüp päih law se, jah tak hüt lü kami kdungki u lü, cit u ngü se, ami van naw, ami khyucae mah maha mlüh khaw kpung üngkhyüh tui pei cäpa am jah tha law; acua mkhuk msüm u lü kami ktaiyüki.

⁶ “Mya lü bä” ti u lü mat jah mat mtheh lü mlawng üng kami ngcum üng amimi cun ami ima nghlat bekie.

⁷ Acunüng, Turah üngka naw mlawng am kami ceh law päng üng, Potalemaia kami phaki, acua jumeikie jah hnukset u lü, ami veia mhnüp mät kami veki.

⁸ A ngawi be tü üng, Ketarih kami phaki; acua thangkdaw sangki Philipa ima kami lutki, ani cun Jerusalema jah kpüi khaia xü, khyühe üngka mata kyase a veia kami veki.

⁹ Ani cun nghnumica phyü jah ca naki. Amimi naw Pamhnama ngthu sang hükie.

¹⁰ Acua mhnüp khawvei kami vekie, acuna üng Judah hnea ka Akabas ngming naki sahma mat lawki.

¹¹ Kami veia law lü, Pawluha ksawmyüi lo lü amäta kut khawe jah khit lü, “Jerusalema Judahe naw hikba hina ksawmyüi ka naki

khit u lü, khyangmjükceea kut üng ap khaie, Ngmüimkhya Ngcim naw a pyen ni” a ti.

¹² Acuna ngthu kami ngjak ja, Pawluh cun Jerusalema käh cit khaia keimi jah akcee naw kami nghuinak.

¹³ Pawluh naw, “I vai kyap u lü, ka mlung nami na puksetsaki ni? Bawipa Jesuha ngminga phäha ta Jerusalema ami na khih däka am kya lü thih vaia pi ka lingki ni” a ti.

¹⁴ Mtheh lü am ng’yah se, “Bawipa hlüeia kya kawm” kami ti.

¹⁵ Acua kcün kami sumei känä kami phüie jah pitpyang u lü, Jerusalema kami citki.

¹⁶ Ketariha üngka axüisawe avang kami hlawnga law hngakie naw,* Manatung ngming naki jumei kcük üngka, Kuparuha ka mat, kami cehnaka ami ngkhahpüi hnga.

Jakuka veia Pawluh citki

¹⁷ Jerusalem mlüh kami pha üng jumeikie naw hlimtui khaia ami ja na khinnak.

¹⁸ A ngawi üng, Pawluh naw Jakuka ima jah cehpüi se, acua sangcim ngvaie vek.

¹⁹ Pawluh naw amimi jah hnukset law päng lü, a khüibinak summangei lü Pamhnam naw khyangmjükceea veia bi a bisak naküt avan a jah mtheh.

²⁰ Amimi naw acuna ngthu ami ngjak üng Pamhnam mhlünmtai u lü, Pawluh veia, “Pawluh aw, Judah khyange thawng khawhah jumei lawki ja ami van naw Thum pi kthanakie;

* **21:16** Kami kainak vaia ima a jah cehpüiam ani üngkami kainak vaia ima ka khyang cun ami lawpüi.

²¹ acunsepi, khyangmjükceea veia vekiea Judahea veia, ami cae ami vun käh ami jah mawih vai ja Mosia Thum ami hawih vaia na ja mtheiki tia pyenkie.

²² Ihawkba kya hlüki ni? Na pha law pi ngjakie ni.

²³ Acunakyase, na veia kami pawh vai cun hin ni. Khyütam taeiki khyang kphyü kami vekie.

²⁴ Acune jah ngkhahpüi lü, ngcimcaihnak pawia va ngpüi hnga lü, lu kteinaka phu jah pet pe kaw pi.† Acunüng, khyange naw, ami ngjak am kcangki tia, namät kung naw Mosi thum na läki tia ksing khaie.

²⁵ Khyangmjükce jumeikie am, juktuh üng peta eiawk, khisa thi, khisa ami kbüh ja hüipawmnake üng ami ngcimcaih vaia kyaki tia, ca kami yuk päng ni” ami ti.

²⁶ Acuna ngawi üng Pawluh naw, acuna kpmie jah ngkhahpüiki naw, ami veia ngcimcaih hnga lü, Templea k'uma lutki naw, ami ngkhäa phäha petnak akce pawh lü ngcimcaihnaka mhnüpa kümnak vaia mhnüp cun ivei hjo khai ti cun a jah mtheh.

Temple k'uma Pawluh ami man

²⁷ Mhnüp khyüh a küm law hlü üng, Asah üngka Judahe naw Pawluh templea k'uma hmu u lü, khyange naküt jah ksükie naw ami man.

²⁸ Ngpyang u lü, “Isarel khyange aw, jah kpüi law ua, hin naw khaw naküt üng khyang naküta veia, Judah khyangea thume, hina Temple jah

kse na ve; acun däk am ni, templea k'uma pi Krik khyange jah luhpüi lü, hina Temple ngcimcaiki pi mtüihkhehsaki ni” ami ti. (

²⁹ Am acun ham üng Epheta ka Throphimah naki Pawluh naw mlüh k'uma a ceh hü püi hmu u se, templea k'uma cehpüikia pi ami ngaih.)

³⁰ Mlüh üngka ami van üng ngthang hü lü, ngbäm lawki he naw, Pawluh man u lü, temple kpunga kaih lawki he naw, asäng üng ksawhe ami jah khaih law.

³¹ Pawluh hnim vaia ami bü ja, Jerusalema khyange naküt aktäa suksak lawki he tia ngthu cun Romah yekap ngvai säiha veia phaki.

³² Acunüng, ani naw yekape ja yekap ngvaie jah cehpüi lü, ami veia dawng ktäi se; yekap ngvai säih ja yekape jah hmu u lü, Pawluh ami kpai cun ami hjaüh.

³³ Yekap ngvai säih naw Pawluh law sih lü, manki naw, mthiyüi nghngih am jah khisak lü, ua kyaki, i pawh khawiki tia a kthäh.

³⁴ Khyange akce pyen u lü ngpyang u se, i ami pyen am ksing thei lü, Pawluh cun yekapea venaka ami cehpüi.

³⁵ Acunüng, khyange naw aktäa kutban na hlü u se thukcakia ceh u lü, yekape naw kawt u lü Pawluh cun ami cehpüi.

³⁶ Khyang naküt naw, “hnim ua” tia Pawluha hnua ngpyangkie.

Pawluh amät asungkhamnak

³⁷ Pawluh naw yekapea venaka ami luh law hlüpüi üng yekap ngvai säiha veia, “Na veia

ngthu pyen lü ng'yah khai aw?" a ti. Acunüng, ani naw, "Krik ngthu pyen theiki aw? ti lü akthäh.

³⁸ Nang ajana, yea ngthawn lü, khyang thawng kphyü ye vaia kpyawnga ja dawngpüikia Egypt khyanga am na kyaki aw?" a ti.

³⁹ Pawluh naw, "Kei cun Kilikih hne, Tasuh mlüha ngtüikia Judah khyanga ka kyaki, ka venaka mlüh pi sawxata am kya, mlüh ktung ni, na bä ni hina khyangea veia ngthu na pyensaka" a ti.

⁴⁰ Acunüng, yekap ngvai säih naw täng se, Pawluh naw khyak üng ngdüi lü, khyangea ngdümnak vaia a kut kha lü ami ngdüm law ja, Hebru ngthu am:

22

¹ "Ka püi Isarele aw, ka ngsungkhameinak vai na ngai ua" a ti.

² Hebru ngthu am, ami veia ngthu pyenki ti ami ksing ja, käh khihkkeh law u se, acunüng, Pawluh naw,

³ "Kei cun Kilikih hne, Tasuh mlüha ngtüikia Judah khyanga ka kyaki, acunsepi, hina Jerusalema Kamaleilaha vei ngthei lü ka ngbang lawki, jah mjükphyüinakiea thume pi ka ngthei khawiki, tungawi üng nangmia mäiha Pamhnama phäha ka ktha na khawiki.

⁴ Acunüng, nghnumi kpami ja man lü thawngim üng jah khyum lü, thihnak vaia acuna Bawipaa Mawnglam läkie cun ka jah mkhuimkha khawiki.

⁵ Ktaiyü ngvaie ja kawngcie naküt naw pi acuna ngthu cun cangki tia na ksing püikie, Damateta veki ka püi Judahe vei ami yuk ca pi ka yahki; acuna kyase acua cit lü, jah man lü Jerusalema jah chepüi lü jah mkhuimkha khaia ka citki.

*Pawluh naw a ngthunghlainaka mawng a pyen
(Ngs 9:1-19; 26:12-18)*

⁶ Cit lü, Damateta pei ka pha law üng, mhnüp nglunga angxita khana ka akvai aktäa vaiki ka peia vai lawki.

⁷ Mdek üng ka kyuk üng, ka veia, “Sawluh, Sawluh, ise na na mkhuimkhaki ni?” tia kthai ka ngjak.

⁸ Acunüng, kei naw, ‘Bawipa aw, nang u ni?’ ti lü ka msang be. Acunüng, ani naw, ‘Kei Nazaret Jesuh, na mkhuimkhaa ka kyaki’ a ti.

⁹ Acunüng, ka püie naw akvai cun ami hmu te, na ngthuheipüikia kthai cun am ngjak u.

¹⁰ Kei naw, ‘Bawipa aw i ka pawh khai?’ ka ti. Acunüng, Bawipa naw, ‘Tho law lü, Damateta cita, na pawh vai naküt cun ning mthekh khaie ni’ a ti.

¹¹ Acuna akvaia phäha ka mik mü se, ka püie naw ami kut am na kaih u lü, Damateta ka citki.

¹² Khyang mat Anani ngming naki, thum kchang na lü Judahe naw ami leisawng acua veki.

¹³ Ka veia law lü, ka peia ngdüi lawki naw, ‘Ka na Sawluh aw, mdei law be a ti. Acunüng, hmu law be ngüse ka teng kyet.

¹⁴ Ani naw, ‘Mi pupaea Pamhnam naw, a hlüei na ksing khaia, ngsungpyunki Mpya na hmu

khaia, a ngthu na ngjak khaia, ning xü pängki ni;

¹⁵ Na hmu ja na ngjaka ngthu cun khyang naküta veia ania phäh saksi khai.

¹⁶ Ise na ve sawxatki ni? Tho law lü, Baptican khana. A veia na ktaiyü üng na mkhyekatnake ja kpyawta kya khai' a ti.

Pawluh Khyangmjükceea veia ngthu pyen khaia citki

¹⁷ Jerusalema ka ceh be käna, temple k'uma ka ktaiyü k'um üng, mdangnak ka hmuhki,

¹⁸ mdangnak üng Bawipa naw, 'Angxita Jerusalem üngka naw cita; ka ngthu na sang vai ahin üng am ning ngja hlü ve u' a ti cun ka khamei yahki.

¹⁹ Kei naw, 'Bawipa aw, sinakok naküta jumeiki naküt thawngim üng ja khyum lü, ka jah kpai khawi ksingkie;

²⁰ na saksi Stephen a thisen ami hnim üng, kei pi a peia ngdүй hnga lü, a thih vai yüna lü, hnimki hea ami suisak ka na kpawmki' ka ti.

²¹ Ani naw, 'Cita, hin üngka naw athuknak, khyangmjükceea veia ning tüih veng' a ti.

²² Acuna ngthu a pyen veia khyange naw ngai u lü; acunüng, angšana ngpyang u lü, "Ceh ta ua! Hnim ua, xüng khaia am daw ve" ami ti.

²³ Ngpyang u lü, ami suisake jah sut u lü, jah kha u lü, mput khan da phuh u se;

²⁴ acunüng, Romah yekap ngvai säih naw, Pawluh ise acukba ami pawh tia ksing hlü lü, "Yekapea venaka ceh u lü, kpai u lü ise Judahe

acukba ngpyangkie ti cun kcet ua” ti lü a jah mtheh.

²⁵ Acunüng, khit u lü kpai u se, Pawluh naw, a peia ngdüikia yekap ngvai üng, “Romah khyang naki, am mkhyenak angsinga am ksing xa u lü nami kpai hin nglawiki aw?” a ti.

²⁶ Acunüng, yekap ngvai naw, acun a ngjak ja, yekap ngvai säiha veia cit lü, “Na bi law cän ngaia, hin hin Romah khyanga kya ve” ti lü, a mtheh.

²⁷ Acunüng, yekap ngvai säih naw law lü, a veia, “Romah, khyanga na kyaki aw? Na mtheha” a ti. Acunüng, ani naw, “Ä, kei Romah khyang ni” a ti.

²⁸ Acunüng, yekap ngvai säih naw, “Romah khyanga ka kyanak vaia ngui khawha ka peki ni” ti lü, msang se, acunüng, Pawluh naw, “Kei cun Romah khyanga ka ngtüi lawki” a ti.

²⁹ Acun ja kcet khaia bükie naw Pawluh cun angxita cehta u se; yekap ngvai säih naw pi, Romah khyang ni tia ksing lü, Romah khyang a khiha phäha aktäa kyühei lawki.

Kawngci hmaia Pawluh

³⁰ A ngawi üng, Judahe naw ise Pawluh ami hneng ti ksing hlü lü, yekap ngvai säih naw Pawluh cun xaki naw, ktaiyü ngvaie ja ngth-umkhyahkie naküt jah ngbämsak lü, ani cun lawpüiki naw, ami hmaia a ngdüih lawsak.

23

¹ Pawluh naw kawngci jah бүк лү, “Ka пүи Isarele, Tungawi cäpa Pamhnama hmaia ngcim-caihkia mlungmthin am ka xüngseiki” a ti.

² Ktaiyü ngvai Anani naw a peia ngdüikie üng Pawluha mpyawng ami kbei vaia a jah mtheh.

³ Acunüng, Pawluh naw, “Nang abawk am hluka lung, Mhnam naw ni kbei khai; ngthumkhyah khaia ngawh lü, am kcang khaia thum pawh lü ami na kbei vaia na pyenki” a ti.

⁴ A peia kae naw, “Pamhnama ktaiyü ngvai na ksekhanaki aw?” ami ti.

⁵ Pawluh naw, “Ka пүи Isarele aw, ktaiyü ngvaia akya am ksing veng; ‘Na khyang jah upki käh na ksekhanak vai’ tia Cangcim naw pyenki” a ti.

⁶ Pawluh naw, avang Sadukee, avang Pharisee tia ksing lü, “Ka пүи Isarele aw, kei Pharisea ka kyaki, Pharisea cakpaa pi ka kyaki; khyangkthi tho be khai tia ka äpeia phäh, ahikba nami na kcetki” a ti.

⁷ Cunüng, acuna ngthu a pyen law päng ja, Pharisee ja Sadukee ngcuh law u lü, ngtai lawki he.

⁸ Ami ngtainaka suilam cun, Sadukee naw, “Khyangkthia thawnak be am veki, khankhawngsä he, Ngmüimkhyae am veki” ti khawi u se; Pharisee naw, acuna lam kthum cun veki tia ami juma phäha kyaki.

⁹ Pharise da ka thum ksinge ngdüi law u lü, “Hina a katnak i am ksing ve üng; Ngmüimkhyae

naw pi kyase, khankhawngsä naw pi kyase, a ngthuheipüi üng pi, ia am kya?" ami ti.

¹⁰ Ngguh law dämdäm u se, yekap ngvai säih naw, Pawluh man u lü, amte mtea ami pawh law vai kyühki naw, yekape veia cit u lü ami vei üngka naw yekapea venaka ami cehpüi vaia a jah mtheh.

Pawluh ami hnimnak hlü

¹¹ Acunüng, mthana Bawipa cun Pawluha peia ngdüi lü, "Käh cäi kawpi, ka ngthu Jerusalema na saksia mäiha Romaha pi na saksi khai" a ti.

Pawluh ami hnim vaia ami bü

¹² Khawthai law lü Judah khyange, Pawluh am ami hnima küt üng i käh eiaw khaiea, ng'yüngce u lü vekie.

¹³ Acukba ng'yüngce u lü ngkhämkie cun khyang kphyükipa kthaka nungkie.

¹⁴ Acunee cun ktaiyü ngvaie ja ngvaiea veia cit u lü, "Pawluh am kami hnima küt üng i käh kami mdep khaia kami ng'yüngceki ni.

¹⁵ Acunakyase, khaw ngawia, yekap ngvai säih naw Pawluh cun nangmia veia lawpüi lü, ngkhai ngai khaia nami kcet vaia mäiha, ngvaie am atänga yekap ngvai säiha veia kthäh ua, acun üng Pawluh hnim vai ami täng. Acunüng, Pawluh nami veia am a pha law ham üng keimi cun kami hnim khaia, ngtün päng ve üng" ami ti.

¹⁶ Acunsepi, Pawluha a naa ca naw, lama ami na maha mawng cun ngja lü, yekapea venakaa va lutki naw, Pawluh am a va mtheh.

17 Pawluh naw, yekap ngvai mat khü lü, “Hina cawngpyang hin yekap ngvaisäiha veia cehpüia; i mä a pyen vai ve khai ni” a ti.

18 Yekap ngvaia veia cehpüi lü, “Thawngim üng kyumkia Pawluh naw na khü lü, hina cawngpyang na veia ka lawpüi khaia, ana tüih law, na veia i mä a pyen vai ve ve” a ti.

19 Acunüng, yekap ngvai säih naw a kut üng man lü, akcea cehpüiki naw, “I na na mtheh hlüki?” ti lü a kthäh.

20 Ani naw “Judah ngvaie naw khaw ngawia Pawluh kawngcia na lawpüi vai ngjak'hlü ve u. Pawluha mawng cun ami naw aksing ngtea ksing hlükie hana ngsaih ve u, a ti.”

21 Acunsepi, ami pyen käh jah na kcang na kawpi; khyang kphyükipa kthaka nungkie naw ani k'äih u lü ngthupkie ni, acune cun ani, am ami hnima küt üng i käh eiaw khaiea ng'yüngcekie ni; atuh na ja msangnak be vaia ngthu k'äihkie, ngtün u lü vekie ni” a ti.

22 Acunüng, yekap ngvaisäih naw cawngpyang cun tüih be lü, “Hina ngthu na na mtheh hin u pi käh ksingsak kawpi” a ti.

Pe uk Felika veia Pawluh ami tüih

23 Yekap ngvai säih naw jung ngvai nghngih jah khü lü, “Tuh mü naji kaw üng, Ketarih khaw cäpa cit khaia yekap phyanghngih, ngsela ngcumki khyang khyühkip, kcei kawtki khyang phyanghngih ngsungcei u se ti lü” a jah mtheh.

24 Pe uk Felika veia phyawn lü pha khaia, Pawluha ngcumnak vaia ngsela ami pet vaia pi a jah mtheh sih.

25 Ngvai naw hikba ca yu lü;

26 “Kalawdih Lusik aw ami leisawnga pe uk Felik naw ning hnuksset ve.

27 Hina khyang Judahe naw man u lü ami hnim law hlü ja, ami veia yekape jah ngkhahpüi lü ka citki, Romah khyang ni tiaa ksing lü ka yung law.

28 Acunüng, ami mkatnaka suilam ksing hlü lü, ami kawngciea veia ka cehpüi.

29 Ami thum ia phäha ami mkat tia ka ksing, acunsepi ami mkatnak üng thihnak vai ja man u lü thawng üng khyum vaia anglawinak i am hmu veng.

30 Judahe naw ami hnim vaia kham hükie ni tia khyang naw a na mtheh ja, na veia ka tüih law ni, mkatkie naw pi ami mkatnaka mawng na hmaia ami pyen vaia ngthu ka jah pet ni” a ti.

31 Ngthu a jah peta mäiha yekape naw mthan nglunga Pawluh cun man u lü, Antipatariha ami cehpüi.

32 A ngawi üng, ngsela ngcumkie Pawluh am jah cehsak u lü, amimät cun yekapea venaka nghlat law bekie.

33 Ketarih ami pha law üng, ca cun pe uk Felik am pe u lü, Pawluh cun pi ami msum.

34 Pe uk naw a kheh law päng üng, Pawluha venaka khaw a kthäh. Acunüng, Kilikih khawa ka ni tia a ksing law ja,

35 “Ning mkatkie ami pha law käna, na mawng ka ning ngaih pet khai” a ti. Acunüng, Pawluh cun pe uka junga ami ngäng vaia ngthu a jah pet.

24

Judahe naw Pawluh ami mkat

¹ Amhnüp mhma këna, ktaiyü ngvai säih Anani, ngvaie avang ja seihne Tetulah ngsut lawki he naw, Pawluha mawng cun pe uka veia ami pyen law.

² Acunüng, Pawluh cun khü u lü Tetulah naw mkat law lü, “Bawi kdaw säih aw, nanga phäha dim’yenak am kami vea phäh, kami pea phäh na jah thunghlai hin nanga jah cehcawn phäh ni.

³ Angläta, a hawa pi jenak am kami veki cun nanga bänak ni.

⁴ Acunsepi, na kcün khawvei am la hlü veng lüpi, na mlunga a nemnak am ka pyen cun na ngaih pet vaia ning nghui na veng.

⁵ Hina khyang hin, Nazaret ami ti khyange üng ngvai bi lü, khawmdeka khana Judahe naküt jah suksaki kami ksingki.

⁶ Pamhnama temple pi mtüihkhehsaki; acunakyase, kami man ni.

⁷ Na thuma mäiha, a mawng mtai pet vaia kami tängki ni, acunsepi yekap ngvaisäih Lusika naw law lü, kami kut üngka asihlinga jah hut hlawk lü, amät kami mkatkie na veia law vaia ngthu a jah pet.

⁸ Namät naw hina khyang kthäh lü, kami mkatnak naküt cun na ksing khai ni” a ti.

⁹ Acunüng, Judahe naw pi law u lü ahin hin kcangki ni” tia ami pyen sih.

Pawluh Felika hmaia a ngsungkhameinak

¹⁰ Pe uk naw Pawluh cun ngthu pyen khaia a kut säng se ta, Pawluh naw, “Nang kum khawvei

hina khyangmjü lei jah mkhyah pe lü na veki tia ka ksinga phäha, aktäa jenak am kamäta ngsungkhameinak na hmaia ngthu ka pyen law khai.

¹¹ Jerusalema Pamhnam hjawkhah khaia ka cehnak atuh mhnüp xaleinghngih va law hamki tia namät naw na ksing khai.

¹² Temple k'uma pi, sinakoka pi, mlüha pi, upi ka ngcuhpüi, khyang ka ksük pi am na hmu u.

¹³ Tukbäih pi, ami na mkatnak vai tuilam am mdan thei ve u.

¹⁴ Acunsepi, hin hin na veia ka phyeh khai, Kami pupaea Mhnam kei naw ka hjawkhah Mawnglam cun am kchang ami ti ni. Sahmaea caupe jah Mosia thum üng ng'yuk nakütki pi ka jum hngaki.

¹⁵ Ka äpnaq pi veki ta Pamhnam naw khyang naküt akdaw ja akse pi thihnak üngkhyüh jah mtho law be khai ni.

¹⁶ Acuna phäha, Pamhnam veia ja nghngicima veia pi, ka mlungmthina käh mkhyemsawh vaia ka ktha naki.

¹⁷ Acunüng, kum khawvei anghjawk käna ka khyangea ngui jah pet vai ja ngkengtainak pawh khaia ka lawki.

¹⁸ Ngcimngcaihnak pawl päng lü ahine ka jah pawh k'um üng amimi naw Templea na hmuhkie. Ka hlawnga khyange ja suksaknak pi am ve u.

¹⁹ Acua, Asah üngka Judahe pi vekie, acune naw law u lü ka khana ami pyen vai a vea kyak üng, hin üng na hmaia ve u lü na mkat khai e sü.

²⁰ Am acunüng, hina khyange naw, kawngcia hmaia ka ngdüih üng, ka katnak ami hmuh khawia kyak üng atuh pyen u se,

²¹ Kawngcia hmaia ka pyen mata, ‘Khyangkthi tho be khai tia ka jumeia phäha na mkatei u lü tuhngawi nami hmaia ami na lawpüi ni” a ti.

²² Acunüng, Felik naw, Mawnglam cun ana ksing lawa kyase, “Yekap ngvai säih Lusika a pha law üng na mawng ka ning mkhyah pet khai” a ti.

²³ Pawluh cun a jah ngängsak vai ja, a püipawe naw pi law u lü ami mbeimbawk law vaia yekap ngvai am ngthu a pet.

Felik ja a khyu Dusilaha hmaia Pawluh ngdüiki

²⁴ Mhnüp khawveica anghjawk këna, Felik cun a khyu Dusilah, Judah nghnumi ngkhahpüi lü law beki naw, Pawluh ja khüsak lü, Khritaw Jesuh jumnaکا ngthu cun ngaiki.

²⁵ Pawluh naw, dawkyanaka ngthu, mät ja mät nängeinaka ngthu, ngthumkhyahnak ve law khaia ngthue a jah mtheh üng, Felik naw aktäa kyüh law lü, “Cit be maa, akcün a awng üng, ning khü law be kawm” a ti.

²⁶ Pawluh naw ngui a pet vai a ngaihк’uheia kyase, khü lü a kthäha kyaki.

²⁷ Acunsepi, kum nghngih päih këna, Pocih Festuh naw Felik mthawng se; acunüng, Felik naw Judahea ksunga a ngminga daw vai ngai lü Pawluh cun thawngim üng a khyum hüt.

25

Festuh Emperoa veia Pawluh ngdüiki

¹ Festuh naw khaw a uk law, amhnüp thum këna Ketarih mlüh üngka naw Jerusalema citki.

² Ktaiyü ngvaie ja Judah üng axüngvaie naw Pawluha mawng cun akse lama ami na mtheh.

³ Jerusalem mlüh üngka naw a jah laksak vaia nghui na u lü, lama a na kham u lü ami hnim vaia ami bü.

⁴ Acunsepi, Festuh naw, “Pawluh cun Ketariha thawngima, kei pi acua ka cit be khai.

⁵ Acunakyase, nami mkhawng Ketarih khawa Pawluh mkatei khaiea ka hlawnga cit hnga u se, kakia akya üng” ti lü, a jah msang.

⁶ Ami veia, mhnüp khyet, mhnüp xa hlawk a ve khap üng, Ketariha ju cit beki; acunüng, a ngawia ngthumkhyahnak üng ngaw lü, Pawluh ami lawpüi vaia ngthu a ja pet.

⁷ Acunüng, ami lawpüi ja, Jerusalem üngka naw ju lawki hea Judahe cun a peia ngdüi u lü, a khana am cangkia mkatnak khawha ami pyen. A mkhyenak kcang cun am ami msuh thei.

⁸ Pawluh naw a cangnaka ngthu pyen lü, “Judahea thuma khana pi kyase, Pamhnama temple khana pi kyase, Romah Emperoa khana pi kyase, katnak ka pawh i am ve naw” a ti.

⁹ Acunsepi Festuh naw, Judahea khana a ngminga kdaw vai ngja hlü lü, Pawluh üng “Jerusalema hang cit lü, acuia ka hmaia hina mawng mtai vai na ngaiki aw?” ti lü, a kthäh.

¹⁰ Pawluh naw, “Romah Emperoa ngthumkhyahnaka hmaia ka ngdüi hlüki ni; Judahea

khana katnak i am pawh ni se, acun cun nang naw haw angsinga ksing ye lü.

¹¹ Thum lümkan lü, thihnak vaia katnak ka pawh üng ta ka thih vai pi am ma nawng; acunsepi, hinea ami na khyaknak aphung i am a ve üng, u süm naw ami veia käh na pe thei khai. Romah Emperoa veia ka ngdüi khai” a ti.

¹² Festuh naw a ngthumkhyahpüie a ja ksük käna, “Romah Emperoa veia ngsut khaia bü veki, Emperoa veia na ngsut law mkyäi khai ni” ti lü a msang.

Akipah ja Berania hmaia Pawluh ngdüiki

¹³ Angsawkca käna, sangpuxang Akipah ja Berani cun Ketarih Mlüha ngsut law ni lü, Festuh ani hnukset law.

¹⁴ Acunüng, mhnüp khawvei acuia veki xawia kyase, Festuh naw Pawluha mawng cun sangpuxanga veia pyen lü, “Felik naw thawngim üng kyumki u aw yawk hüt se;

¹⁵ Jerusalema ka ve hui üng, ktaiyü ngvaie ja Judah ngvaie naw a mawng na mthoh u lü, mkat vaia ami na nghuinak.

¹⁶ Acunüng, kei naw ami veia, ‘Ami khyaka khyang ja khyakie ngkhyum u se, ami khyaknaka mawng üng cangnak am ami hmu hama küt üng, amät asungkhomei vai akcün am a yaha küt üng khyang u pi mkhuimkha vaia thum hin Romaha mi thuma am kyaki ni’ ti lü, ka ja msang.

¹⁷ Acune hina khaw ami pha law ja, käh msawk lü, a ngawia ngthumkhyahnak üng ngaw ktäi lü, ani cun ka ja khüsak.

18 Khyakie ami ngdüi law ja, ka ngaia mäi kunga, a khana a am dawkia mkhyenak i am pyen thei u.

19 Ami jumnaka thume ja Jesuh khyang mat thi pängki cen Pawluh naw, 'Xüing beki ni' tia pyen se, acuna phäha, a khana katnak veki tia ami khyak lawa kya hüki.

20 Acunüing, kei naw acuna mäih cun ihawkba bi vai am ka ksingki naw, Jerusalema cit se, acuia a mawng mtai pet vai a ngai ja am a ngai ka kthäh sum.

21 Acunsepi, Pawluh cun yekap am cit u lü hlüing säihkia sangpuxanga mtai pet vaia a nghuinak, acuna Romah Emperoa veia am ka tüih hama küt üng yekape am ka jah mtätsak" a ti.

22 Akipah naw Festuha veia, "Kei haw acuna ngthu pyen ka ngai vai ka na ngai khawiki ni" a ti. Acunüing, Festuh naw, "Khawngawia pyen se ngai kaw pi."

23 Acukba, a ngawia, Akipah ja Berani cun hlüingtainak am law ni lü, yekap ngvaie ja mlüh üng khyang kyäp kyäpe am, ngthu pyennaka ima lut ni se; acunüing, Festuh naw Pawluh a ja lawsak.

24 Festuh naw, "Sangpuxang Akipah ja hin üng vekiea khyange aw, hina nami hmu hin, a mawngmaa phäha, Judahe naküt naw mkatei u lü, käh xüing ti khai tia, Jerusalem mlüha ja hin üngkae naw ka veia ami kthäh.

25 Acunsepi, thihnak sen vaia i katnak am pawhki ti ka ksingki; acunüing, amät naw ng-

vaisäih sangpuxanga veia a ngsut vai ngaikia kyase, tüih vaia ka bü ni;

²⁶ acunsepi, ania mawng Emperoa veia ka yuk vai am ksing veng. Acunakyase, nami hmaia ka lawpüi ni, sangpuxang Akipah nanga maa ka lawpüi ktunga kyaki ni, kthäh lü i yaw hleng yuk vai ka hmunak vaia.

²⁷ Khyang kyum, sangpuxang ngvaisäiha veia tüih u lü, a mawng ami khyaknak, käh ksingsak lek cun, am mawngkia ngai veng” a ti.

26

Akipaha hmaia Pawluh a ngsungkhameinak

¹ Akipah naw Pawluh üng, “Na mäta phäh ngthu pyen lawa” a ti. Pawluh naw, a kut säng lü, a ngsungkhameinak pyen lawki;

² “Sangpuxang Akipah aw, Judahe naw ami na khyaknak naküt üng, ka ngsungeinak ngthu tuhngawi na hmaia ka pyen khaia akyaka phäha, dawki ngai veng;

³ Judahea thum ja ngcuhnak naküt aktäa ksingki. Na mlung msaü lü na na ngaih vaia ni nghui na veng.

⁴ “Ka dik ham üng ihawkba ka ve khawiki ti cun Judah khyange avan naw na ksingkie. Akcüka kamäta pe ja Jerusalema ihawkba ka kcün ka sumei pi ksingkie.

⁵ Judah jumnak thum üng aktäa ling lü, Pharisea ka kya khawi cän ajana na ksingkie, ami pyen vai ta saksi na u se.

⁶ Kami pupaea vei Pamhnam naw a jah peta khyütam äpeinaka phäha kei hia ka ngdüi law khaia na pawh ve u,

⁷ amhnüp amthan Pamhnam hjawkhah u lü kami khyange pasang xaleihngihe naw ami yahei vaia äpeikie. Ahina äpeinaka phäh Judahe naw na mkatei ve u ahlüng säih sangpuxang aw.

⁸ Hin üng veki khyange naw ise Pamhnam naw khyangkthi mtho beki ti hin, am a nami jum thei ni?

⁹ “Kei naw pi Nazaret Jesuha ngming cawkei lü, ka pawh khawh naküt cun ka bikia ka na ngai law khawiki.

¹⁰ Ahin hin Jerusalema ka bilo khawiki. Ktaiyü ngvaiea veia bilawnak thei ana yah lü, Mhnama khyang khawhae thawngim üng ka ja khyum khawiki; ami jah hnim vai üng kei naw pi ami thih vaia ka täng khawiki.

¹¹ Sinakok k'uma jah mkhuimkha lü, ami jumeinak ami cehtak vai khawvei ka pawh khawiki. Aktäa ka mlung na uiawng se, pe kcea ka mlüha vekie pi ka jah mkhuimkha khaia ka cit hü khawiki.

*Pawluh naw a ngthunghlainaka mawng a pyen
(Ngs 9:1-19; 22:6-16)*

¹² “Ahina phäh vaia Ktaiyü ngvaiea vei ana yah lü Damatet mlüha ka citki.

¹³ Sangpuxang aw, ka ceh mhnüp nglunga kyaki, ka jah cehpüia khyange ja kei pei cu nghngi kthaka vaiki akvai cun khan üngkhyüh vai lawki ka hmuh.

14 Kami van mdek üng kyu u ngüse, Hebru am, 'Sawluh, Sawluh, i vai na na mkhuimkhaki ni? Se naw a mahpaa kcung a leha mäiha i vai namät naw namät na pawhki ni?' tia, kthai ka ngjak.

15 'Bawipa aw, nang u ni?' ka ti. Acunüng, Bawipa naw, 'Kei Jesuh, na mkhuimkhaa ka kyaki.

16 Acunsepi, tho law lü; na khaw am ngdüi lawa. Ka ning mpya vaia na veia tuhngawi ka ngdang lawki. Nang naw tungawi na h*mu cun jah mtheh lü malama i ka ning mhnuh khai ti cun ka pyen khai.

17 Isarel khyange naküt ja Khyangmjükceea kut üngka naw ka ning yung khai; ami mik na ja mdeisak khaia, ami veia ning tüih veng.

18 Ami mik jah mdeisak lü, nghmüp üngka naw akvaia na jah nghlatsak khaia khawyama johit üngka naw Mhnama veia ja nghlatsak lü, kei ami na jumeinak am ami mkhyekatnake jah mhläta lü Pamhnama xüe khyange am atänga hnün ami yah vaia ni' a ti.

Pawluh naw a Khutbi a jah mtheh

19 "Acunakyase, sangpuxang Akipah aw, khankhawa ka, ngdannak cun am kcanga veng.

20 Akcüka Damatet ja Jerusalema kaea veia, Judah pe naküta kaea veia, khyangmjükcee veia pi, ngjutnaka nglawia bi bi u lü, ngjut u lü Pamhnama veia ami nghlat lawnak vaia, ka jah mthehki ni.

* **26:16** Cangcim avang üng am vekeia phäh. **26:20** Ngs 9:20,28,29

21 Ahina phäha ni, Judahe naw temple k'uma na man u lü, ami na hnim hlü.

22 Acunsepi, Pamhnama na yungnaka phäha tuhngawi cäpa, hin üng adik ja akdämea veia ka saksi pyen veng. I pyen akcea am kya sahmae ja Mosi naw ami na pyen cun küm law khai ti cun ni ka jah ksinghüsak,

23 Mesijah cun mkhuimkhanak khamei lü, thihnak üngka naw akcüka tho beki tia küikyannaka mawng cun khyangmjükcee jah Judahe veia ka sangki," a ti.

24 Acukba Pawluh naw a ngsungkhameinak pyen lü, Festuh anganga ngpyang lü, "Pawluh aw, ang veki; na ngtheingkhawng khawha naw ning yusak ve" a ti.

25 Acunsepi, Pawluh naw, "Akhlüngtai, Festuh aw, am ang veng; ngthu kcang ka pyenki ni.

26 Sangpuxang Akipah aw! Hina ngthu avan na ksingkia kyase na veia ling lü ka pyen theiki. Hina mawng avan na süm khaia ka ngaiki. I pi thup vai am ve ti cun pi na ksingki.

27 Sangpuxang Akipah aw, sahmaea na jah jumki aw? Na junkia ka ksingki" a ti.

28 Akipah naw Pawluh üng, "Asängca üng Khritjana ka thawn khaia na ngaiki aw?" a ti.

29 Pawluh naw, "Asänga pi kyase, khawveia pi kyase, nang daka am kyakia, tuhngawi ka pyen ngjaki naküt pi, keia kba ami ve law hnga vaia, mthiyüi am khun käh nikia, Pamhnama veia ka ktaiyüki ni" a ti.

³⁰ Sangpuxang, pe uki, Berani ja ami peia ngawhkie ngdüi law u lü;

³¹ a jah cehtak käna, “Hina khyang hin hnim vai ja thawngim üng kyum vaia i pi am pawh” tia ngthähki he.

³² Acunüng, Akipah naw Festuh üng, “Hina khyang naw Romah Emperoa veia a pha vaia am a ngtänga ta hlät vai sü” a ti.

27

Pawluh mlawng am Romaha citki

¹ Italia mlawng am ceh vai ami mkhyah law ja Pawluh ja thawng kyum avange cun Julijah ngmingnaki, Romah yekap üngka ngvai üng a jah mhjum, “Acun cun sangpuxang yekappä ngvai ami ti.”

² Adramutiha mlawng üngka naw, Asah hne üngka tui pei üngkhyüh ngtünei lü athuknaka kami ciki. Maketawnih hnea ka Aristakhas, Thesalonikah mlüh üngka kami hlawnga vekhi.

³ Angawi üng, Sidon kami phaki. Julijah naw Pawluh mceh na lü a khyah, a püiea veia cit se a püie naw hlükawki ami pet vaia a cehsak.

⁴ Acun üngka naw, tui üng kami cit beki, khawkhi naw akceha jah cehsak se, Kuparuh kyawn da kami citki.

⁵ Kilikiha ja Pampuliha pei tui kami khe käna, Lukia hne, Muraha kami phaki.

⁶ Acua yekap ngvai naw Aleksandria üngkhyüh Itali cit khai mlawng hmu lü; a jah ngcumsak.

⁷ Mhnüp khawvei angpäicaa cit u lü akpäihnaka Kanidah mlüh kami phaki. Khawkhi am daw se, Karet kyawn cit lü Kep Salmonih ami ti khe lü kami citkie.

⁸ Va thäihca u lü, Laseah mlüh üngkhyüh am thuki Sep Habar ami tia hnün anänga kami pha lawki.

⁹ Mhnüp khawvei sumei lü, mlawng am msu lü ceh vai a kyühksea phäha, Thawngnaka Mhnüp* pi a khe päng. Pawluh naw jah mcäi lü,

¹⁰ “Khyange aw, atuh mlawng am mi cehta, mlawng ja khawhthem he ami khyüh päih däka am kya lü, mi xünnak pi khyük khaia hmu veng” a ti.

¹¹ Acunsepi, yekap ngvai naw Pawluha pyen am kchang na lü keptin ja mlawng maha pyen a jah kchangnak.

¹² Acuna tui kam cun khawksik khya üng venaka am daw se, cit be tü u lü, Phonenih pha vaia kami kthanaki, a thawn khawh ta acua khawksik khya kami sumei khai kami ngtängki. Phonenih tui pei cun Kareta ve lü, nghngi kyak ja cuma keh, nghngi kyak ja sipa keh da pi kyase ma na hüki.†

Mpanglai khana Khawkhikse

¹³ Khet da khawkhi nghäi ngtün lü khi law se, khyange naw ami ngaia kba thawn khaia ngai u lü, kpunnak yüi kaih lü Karet tui kam da citkie.

* **27:9** Thawngnak Mhnüp: Khaw am daw üngta cehcawn hü khakia kyase Setinper khya a päih üng, am ani üng Oktoper khya kcük üng ami bilawh yah. † **27:12** Nghngi kyak ja cuma keham ani üngnghngi kyak ja sipa keh.

14 Acunsepi, asäng üng, Püi Khawkhi ami tia khawkhi cun kyawn da aktäa khi lawki.

15 Mlawng a cut law üng, mlawng naw khawkhi am näng se, kami ktha päih lü khawa a khinak da a jah ceh hüpüi.

16 Kaladeh ngming nakia kyawna kami ngtunjinnak vai kami hmuki. Mlawng käh a pyak vaia ngyan üng kami pawhki.

17 Mlawng cun jän kaihca lü khäng khaia yüi am ami kpfung. Acunüng Libya kawnga khana a ngtaih vai kyüh u lü, jih ja nemsak lü khawkhia a jah cehnak püia kami citki.

18 Angawi üng khawkhikse khi law se, mlawng üngka phüie cun tui üng ami ja tawn.

19 A ngawi be tü üng, ami naw mlawng üngka phüie cun ami jah tawn be tü.

20 Khaw mhnüp khawvei nghngi ja aisie pi käh ngdang lü khawkhi naw jah mnawk hü se, kami lät khai pi am kami ngai tiki.

21 Khawvei ei kaa kami ve käna, Pawluh ami ksunga ngdüi lawki naw, “Khyange aw, asüa, ka pyen ngai u lü, Karet üngka naw käh mi lawa ta, ahikba pyaknak ja sungpyamnak am mi khamei khai sü.

22 Acunsepi, atuh ning jah nghui na veng, ling u lü ve u, mlawng däk khyük lü, nami xünnak am khyük, a ti.

23 Isetiakyaküng, tuh mthana, ka jumei ja ka hjawkhah, Pamhnama khankhawngsä mat ka veia law lü,

24 ‘Pawluh aw, käh cäia! Empero Sangpuxanga hmaia na ngdüi khai, Pamhnama dawkyanak naw na jah ngkhapkie sak cän jah mpyenei ve.’

25 Acunakyase, khyange aw, ling ua, a na mtheha mäiha kya khai tia Pamhnam ka jumki.

26 Acunsepi, tui kam mat mata mi ngtaih khaie” a ti.

27 Acunüng, mthan xaleikphyü üng, Adih Mpanglaituia khawkhikse naw a jah mnawk hü. Mthan nglunga yekape naw keimi cun kawng da kami ng’et lawki tia cam hü u lü ami ksing law.

28 Acunüng, tuia a thuk cam tü se, lam mku lawkia ami ksing. Asäng nghjawk se ami cam be üng, lam xaleimhma law se ami ksing.

29 Lung a suk vai kyühei u lü, mlawnga ngmei da mthimhjum phyü ju khya u lü, khawa thaih law hlah vaia kami ktaiyükie.

30 Mlawng mawngkie naw, mlawng cun centak vaia ngtäng u lü mlawnga ma mthimhjum khyakia ngsaih u lü mlawngca cun tui üng ami ju khyak.

31 Acun ja, Pawluh naw yekap ngvai ja yekapea veia, “Mlawng mawngkie mlawnga khana am nami ve ta am lät uki” a ti.

32 Yekape naw, mlawngca khihnaka yüie cun, jah cap pat lü, mlawngca cun ami khyah.

33 Khawthaih law hlü ja Pawluh naw, ami van naw ei ami ei vaia a jah nghuinak. “Tungawi, mhnüp xaleikphyü law pängki, i am ei u lü ei kaa nami veki.

34 Acunakyase, ning jah nghui na veng, nami xün vaia i mä ei ua. Nami lusam matca pi am khyük khai ni” a ti.

35 Acun a pyen law päng üng, Pawluh naw muk lo lü, Pamhnama veia jenak mtheh lü khyangea hmaia; mu cun boki lü a ei.

³⁶ Ami vana cäicingnak dim law lü ami ei pi ei law hngakie.

³⁷ Acuna khyange cun phya nghngih ja khyühkip ja khyuk‡ mlawnga khana vekie.

³⁸ Avan naw kami ei law käna, mlawng hang khaia kyung cun mpanglai üng kami jah tawn.

Ami Mlawnga seta mawng

³⁹ Khawa thaih law üng, acuna kawng cun mlawng mawngge naw am ksing u, lüpi tuikam cun ksing u lü mlawng cun acua ngdüi khaia ami pawh vaia ngtün lawki he.

⁴⁰ Acunüng, mthimhjum ja mawngnak ami jah kunnak yüi cun ja mawi pat u lü, tui üng ami mcum. Acun kung üng, jih ja khihnaka yüie cun ja kphyawtkie naw, a ma lama jinu cun khawkhi naw a hmut vaia häi u lü tuikam da citkie.

⁴¹ Acunsepi, mlawng naw mdih su se, mlawnga lu da cun ngtangei lawki, mlawnga ngmei da cun tuiyüi a kyan lawa phäha pyakeiki.

⁴² Yekape naw thawng kyume cun tui jawh u lü ami cen vai kyühkie naw jah hnim vaia ami bü law.

⁴³ Acunsepi, yekap ngvai naw Pawluh a yun vai täng lü, acun ami hnim vaia ami tün cun a jah mkhyawh. Tui jawh theiki naküt cun tui üng kco u lü, kawng da ami jawh ma vaia,

⁴⁴ avange cun, thing pheka khana, avang mlawnga mtimteea khana pek law khaiea a jah mtheh. Acunüng, kami van kawnga phyawn lü kami pek päihkie.

‡ 27:37 Phya nghngih ja khyühkip ja kyuk; cangcim avang üngtaPhya nghngih ja khyühkipa mhma; akce üngtakhyühkip ja khyuk bang.

28

Malitah mlüha pekie

¹ Tui pei cun akdima kami pek käna, khaw kawng cun Malitah ngming nakia kami ksing law.

² Khaw a lü, khaw sik se, acuna khyang jah mhlänakie. Khaw a lü khaw sik se, khawmahe naw mei tik u lü kami van jah na dokie.

³ Pawluh naw thing pawk mkhäm lü, mei am a tih üng ngling law se, kphyu lut lawki naw, a kut cui lü a ven law.

⁴ Khyange naw, kphyu cun hmu u lü, “Hina khyang hin, khyang hnimkia kya kung ve, tui üng lät sepi, Phu sui beki naw a xüng vai am ti ve” ami ti.

⁵ Acunsepi, Pawluh ia am thawn lü kphyu cun mei üng a khyak.

⁶ Amimi naw cun, a pumsa hngawh ta ngphyüng law se, thi lü kyu law khaia ami ngai; acunüng pi khawvei ami k’ä ih käna ia pi am vekie tia ami ksing üng, ami mlung nglat se, “mhnama kya ve” ami ti law.

⁷ Acuna hnün peia, acuna lai ka nakia ngvai säih, Puhbalih ngming naki naw ja je na lü, mhnüp kthum a ja khinnak.

⁸ Acua Puhbaliha pa mhnatei lü a khawn pi msawi se a ihnaka vekie. Pawluh a veia lut lü, a khana a kut mtaihki naw, ktaiyü pe se mya be.

⁹ Acukba a thawn law ja, acuna kyawn üngka khyange am myaki law u se a jah mdaw be.

¹⁰ Acunee naw, aktäa letsawng ami jah pet; mlawnga khana kami hlükaw naküt cun ami jah pet.

Malitah üngkhyüh Romaha

¹¹ Khya kthum Aleksandria mlüh üngkhyüh mlawng “Mhnam Ngphi” ngming naki am kami ceh käna, khawsik khyaa kyase Malta kami awmki.

¹² Sarakuh mlüha pha u lü, acua mhnüp kthum kami awmki.

¹³ Acuna mlüh üngka naw cit u lü Rekon mlüh kami phaki. Angawi üng, cum khawkhi law se, mhnüp nghngihnak üng Pawtajolih mlüh kami phaki.

¹⁴ Acua jumeikie jah hmu u lü, ami veia mhnüp khyüh kami ve khaw ami jah nghuinak. Acukba cu Romah mlüh da kami lawki.

¹⁵ Romaha veki jumeikie naw kami mawng ks-ing u se, acun üngka naw, Apijah jawihtuknaka hnüna khyüh thukia law u lü, khina kainak hnün kthuma venak căpa jah na do lawki he. Pawluh naw jah hmu se Pamhnam je na lü a ktha ve lawki.

Romaha Pawluha mawng

¹⁶ Romaha kami pha üng, Pawluh cun yekap mat naw k'äih lü amät ami vesak.

¹⁷ Amhnüp kthum käna Pawluh naw, ngnama Judah ngvaie cun jah khü lü ngkhyumkie. Ami ngkhäm law üng Pawluh naw ami veia, “Ka püi Isarele aw, mi khyange ja mi pupaea thum am ka jah lümkanke, cunsepi, thawng üng na khyum u lü Jerusalem üngka naw Romahe kut üng ami na mhjum ni.

¹⁸ Romah khyange naw na kthäh u lü, thihnak vai hlawka ka bilawh i am hmu u se, ami na hlät be vai ami täng kyaw.

19 Cunsepi, Judah khyange naw am täng u lü, Empero Sangpuxanga veia ka ngdang khaia amthuia ami na pawh. Ka khyange cun am jah mkatei veng.

20 Acunakyase, nangmi ning ja hmu lü, nami veia ngthueipüi vaia ka ning jah khü ni. Isarele naw ami äpei khyanga phäh kei hin mthiyüi am ami khih ni” a ti.

21 Amimi naw a veia, “Na mawngma Judah hne üngka naw ca am ami yahki, mi khyang u pi hia law lü na khana am dawki mawng cun pi am pyen law u.

22 Acunsepi, na ngpüinak mawng cun hnün naküta khyange naw ksekhanakie kyase na cun-gaih cun keimi naw pi kami ngai hlükie ni” ami ti.

23 Acunüng khaw mhnüp tamkie. Acuna mhnüp a pha law üng Pawluh venak ima khyang khawha lawki he. Angawi lam üngkhyü tünei lü mü vei cäpa Pamhnama khyawng pe cun Mosia Thum ja sahmaea yuknak üngka Jesuha mawng khe lü khyange cun a jah ksingsak vaia jah mthehki.

24 Avang naw a ngthu pyen jum u se, avange naw am jum u.

25 Acunüng, käh ngkhawt law u se, Pawluh naw ngthu mat a pyen käna cit bekie. A ngthu pyen cun hina kyaki; “Ngmüimkhya Ngcim naw sahma Hesajah üngkhyüh nami pupae veia a pyen hin ihlawka cangki ni,

²⁶ ‘Hina khyangea veia cit lü va pyena, akcanga nami ngai khai, acunsepi a suilam am ksing u. Akcanga bükteng u lü pi, am hmuh thei u,

²⁷ ‘isetiakyaküng ami mlung nghmüp lü ami nghnga pi kdenkie lü ami mik pi kbawmkie. Acukba käh thawn lü ami mik naw hmu lü ami nghnga naw pi ngjak khai kyaw. Ami mlung pi ksing u lü kei da nglat law lü ka jah myasak khai ti lü Pamhnam naw a ti.”

²⁸ Acunakyase, Pamhnama küikyannaka ngthu cun Khyangmjükceea veia jah tha lü ami naw cungai khaie” akpäihnak a ti.

²⁹ Acuna ngthu a pyen päng ja, Judahe amimät naw ngcuh u lü cit bekie.

³⁰ Pawluh cun kum nghngih acua amät im ngvat lü, a veia lawki he naküt cun akdawa jah dokhamki.

³¹ Pamhnama khyawngpe ja Bawia Jesuh Khritawa mawng cun lingnak am sangkhapki.

Dai Cangcim Kthai
The New Testament in the Dai Chin language of
Myanmar

copyright © 2018 The Word for the World International

Language: Daai (Chin, Daai)

Contributor: The Word for the World Southeast Asia

The New Testament in Dai
published as

DAI CANGCIM KTHAI

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-09

PDF generated using Haiola and XeLaTeX on 1 Oct 2024 from source files dated 9 Apr 2023

64403bf1-f3a4-54e1-85ed-24da1f3bb235